

MUNTU MUBÌIKILA

KUDÌ NZAMBI

 . . . Neville. Ndi ngùmvwà bibì be bwà kunùlama biimàne kuulu, ku bimanu. Nè mvwa mupicile apa mu cipungidi cikwàbò, kùkaadi bu dībà dijimà nè citùpà nàнку awu, nè bantu bàvwà bùumuka ku ciibi, bayè. Mvwa mutwilàngàne nè Billy kuntu kwàka, nè kwambayè nè mwaba awu wùvwà mulongolola bwà disangisha kubangadi, kubangila ànu mu mapingaja emu. Nàнку ndi. . . Tudi bafume ku dyenza kaadisangisha kakesè aka mwab'ewu. Katùtukù nànsha bacitèèke mu bibèjibeji byà pa kaaba to. Pa nàнку, tudi ànu nè dībà dikesè dyà bwobùmwe.

² Nèнку mpindyewu kùdi misangu yònsò ànu byàbùngì byà kwenza, mùdi bantu bàà pambèlù pàà cimenga bafwànyine kumanya, bwà nè, mwètù emu mùdi ànu ebu bùjika bukwàbò bùbanga, kunyeemakana kutwa kwàka kutwa eku, ànu mu dilwijakaja. Pa nàнку, nkàadi mwenzè bu mwibidilàngàne naabi. Ndi mufike ànu mu mwaba kampàndà wà nè ncyèna mbilekela bintàcisha to, nè mwànyì mwònsò. Nèнку nudi bamanyè's, udi nè cyà kupicishakù ànu cipòòlù cikesè cyà dībà, nè cìvwà nè cyà kwikala cyàbùngì, nè Mukalenge. Wèwè kùyì mwenzè nàнку to, dībà adi kwèna ubwela mu disangisha nè cyashima cyà Nyumà Mwímpè to. Nèнку paùdi ubwela, bu mùvwàbi leelù ewu, mùdiku ànu mutooyi munène, wàbùngì, èè, bitu ànu bu binkolèle ku misangu bwà mémè kubwela, bwà kubènga kwikala mutàcishiibwe ndambu nè ndwijakaja, nudi numòna's, nè kushààla mémè mwinè mubindùlùke. Pàndi ngènzà nàнку, dībà adi ncyèna ànu mwà kufika ku dipeta Nyumà Mwímpè mwaba nànsha wùmwe mu cyòci to.

³ Pa nàнку, bìdi bingenza bibì, nànsha nàнку, bwà bantu bàdi biimàne mu—mu tujila nè mu myaba yònsò pambèlù. Nè bàdi bàlwa, biinangila, bàbwela mu màshinyi àbò nè bàkwàta njila bààlukila. Mvwa muswè kwangata cilongelu citùmbùke lwà kwínshì eku, bwà kwenzakù ànu masangisha makesè à dilòòlò, kàdi cilongelu cidi munkaci mwà kutùngunuka ne kwenza mudimu pa dībà edi, nè bìdi ànu bu binkolèle bwà mémè kucipeta mu ciine cikondo aci. Kàdi ndi muswè kwamba nè ncyà bushùwà ndi ngàanyisha yònsò wa kunùdi, munda nè pambèlù, nè bwà dikwàcishangana dyènù dyà mu mudimu dilenga, nè bwà byònsò binùdi bènze.

⁴ Nèнку mu dindà emu, mu kàlaasà kàà Dyàlumingu, ndi musàkidile bantu bwà mulàmbù ùvwàbo bampèeshe makèèlèlè dilòòlò awu, ùvwà mulàmbù wùmvwà nciyi mulòmbe to.

Bwà kwamba menemene, mvwa mwambile mpaasàtà ewu, mpaasàtà wetù munanga, Mwanèètù Neville, nè bakwàbò abu nè, bìvwa bipiciìbwe bimpè bóbò kubènga kwenza nànkù. Kàdi's bàvwa benze nànkù, nànsha bishi, pa nànkù mvwa muswè ànu kucifidila mulubù. Mpindyewu, ewu mmwaba mukesè, nè kawàkusòmbesha bantu bapite pa nkàmà yisàtù to, ncyèna ngèèla meeji nànkù to. Kàdi's mulàmbù ùvwa wà ndola nkàmà yisàtù nè makùmi àbìdì nè yinaayi, cidi cyùmvwija nè bàvwa beelè biipacila ku ndola umwe pa muntu. Ke mulàmbù mutàmbe bwimpè ùkaadibu kacya pàànyi bampèèshè kacya bàndela ngwòwò awu, bwà búngì bwà bantu. Pa ciibidilu, ùtu wipacila ku meeyà makùmi àbìdì nè ànaayi pa muntu, makùmi àbìdì nè àtaanu. Meeyà makùmi àbìdì nè mwandamutekète mmulàmbù munène, pa muntu. Kàdi ewu ùdi wipacila ku ndola umwe pa muntu. Nè cyà bushùwà ndi ngàanyisha cyòci aci.

⁵ Kàdi pàmwàpa, mu dindà emu, ncìvwa mufikè ku dyambila bàmwè bàà kunùdì to. Tudi basangàne komfitilà, kashèètè kaa komfitilà katèèka pa bibàndilu, nè kùdi màtàpishì makesè àdìbo batùtùmine. Mukàjàànyi nè mèmè tudi tujinga kunwèla nwènu twasàkidila. Nè ndi mutwìshìbwe nè ku wetù mùshindù mutàmbe bulenga wutùdì bamanyè, byònsò abi nebìikalè bwà Bukalenge bwà Nzambì.

⁶ Nè bidi bimpèèsha ànu njiyà yà njinga bwà twìkalapù nè mwaba munène mutùvwà mwà kutùngunuka ànu nè kuya batàngile kumpàlà mukùngulù mule nè kukwàcila bantu mudimu. Kàdi nànsha dilòòlò edi, paanyimà pàà disangisha, ndi nè cyà kuya. Kàdi, ncyàkwikala mukumbàne mwà kuumuka dilòòlò edi to, kàdi kumpàlà kwà dībà mu dindà, bwà kuya.

⁷ Ndi ngàalukila mu diisambòmbò dilwalwà edi dilòòlò. Ngùumuka mu dyàlumingu mu dindà, cyàkàbìdì, bwà kuya ku Colorado. Nènkù ànu disangisha paanyimà pàà dikwàbò, ngènda nya.

⁸ Nè pashìishe masangisha àànyi à dyàmwàmwà dyà mbù àdì àlonda mmu ngondo wa cyongo, àdì mu Australie nè mu Nouvelle Zélande, nè kwònsò aku. Mpindyewu, ndi muswè bwà nùnsambidilèku. Ncyà bushùwà nè ndi njinga masambila ènù.

⁹ Nè pashìishe ndi muswè bwà...twètù bònsò twìkalè nè kusàkidila kùdi Nzambì wa Bukolè bwònsò, Udi mutwènzèle bintu binène nùnkù mu kaadisangisha kakesè aka. Ndi ngèèla meeji nè, bwà mukùngulù wà cikondo, kùkaadi bintu byàbúngì byenjìbwe mu disangisha edi kupita disangisha kanà dyònsò dímvwàku mwenzè kacya bàndela ku tabernacle ewu. Mukalenge mmumwèke ànu bu mukàngùle mabènesha.

¹⁰ Mvwa ndyàmbidila nè, pàmwàpa, mu disangisha edi, bilondèshile cìkèèna-kumòna címvwà mupetè, bwà nè mudimu wànyi wà bwambi newùshintuludiibwè kulwa mudimu wà bwambi mutàmbe bwimpè nè mutàmbe bunène. Mpindyewu,

nebyènzekè ànu menemene bu munùvwà bùmvwè midimu mikwàbò yìsàtù yà bwambi eyi midyànjila kwamba, anyi mikwàbò yìbìdì eyi. Ewu ewu newikalè ànu mùshindù awu, cìkòlà mutàmbe bunène. Kàdi dilòòlò dyà kumpàlà, mèmè kubìikila ànu bantu ku cyoshelu eku, kwalukila buludi ku dijingulula. Dilòòlò diibìdì, ndi mubàbwejè mu cibambalu, kuya buludi too nè ku dijingulula. Nènku malòòlò àbìdì mahsààle aa, pashìishe, twètù kulwa naabù pa cibùmbà cyà ku cyambilu apa, ànu buludi too nè ku dijingulula.

¹¹ Kàdi ànu bwà kufila mulubù wà bìmwe bintu, mwambi kampàndà mufofo mmupetè lumònù lwèndè ku cibùmbà cyà ku cyambilu aku.

¹² Nè bàna bàà bakàji batekète bàbìdì, makèèlèlà dilòòlò awu, basòmbe mu dikalù dyà balèma, nè mäsàamà àdi muntu nànsha umwe kàyì mumanyè nè àdi bìshi to, nànsha ngàngàbukà umwe. Makàsà àbò bunènewù, nè twànà twàbò twà nkàsà tütùuka, minu yitùuka, nè kakùyì cintu nànsha cimwèpelè cìvwà mwà kwenjiibwa bwàbò to. Nènku ànu pàvwà Nyumà munkaci mwà kulaaba apu, mèmè kuya kuntwaku, nè mu Dìna dyà Mukalenge Yesù, mèmè kwela disaamà adi mulawu, nènku kujuukabò mu dikalù dyà balèma adi nè kuyabò. Nènku mu dindà emu, bèèndakana mu tabernacle emu, byenzè bu mwànà mukwàbò kanà yònsò ewu, nè balwè nè babàtìjìibwe nè dibàtiiza dyà bwena Kilistò, apa mene mu ciinà cyà màyì emu, mu dindà emu.

¹³ Piinè apu, mvwa nè tusunsa tukesè twà kulonga, kùkaadi katanci, nè kùvwà bàmwe bàà ku balundà bàanyi, Mwanèètù Hoover, mwambi wa mu Kentucky mwàmwa, mmufume ku dipicila mwaba awu nè ku dishiila mukàjàanyi diyì, nè dilòòlò dishààle adi pàmvwà mbiikila mulongo wa babèedi, mu batèèleji amu, bakàji bàvwà kabàyi nè twartà twà disambila anyi ní ncinyi to, basòmbe ànu kuntwaku munkaci mwà kusambila. Nènku kùvwà mukàji kampàndà uvwa kàyì mudyè cyàkudyà to, kùkaavwa, ngaapu nè mwoyi bungi bwà matùkù; ùvwà nè byuwùjà mu cifi, cyònsò cyùlè. Ke Mukalenge kumubiikila nè kumwondopa. Nènku mu dindà emu kujuukayè kudyà cyàkudyà cyà dindà cyà bunènè bukùmbàne, nè ùdi kaaba aka mwaba kampàndà dilòòlò edi.

¹⁴ Nè bakwàbò, bàvwàye wàmba, nènku, kaa, díbà kadìvwà difwànyine kukùmbana to, bwà bintu bìdì Mukalenge wetù mwenzè. Pa nànkù, bwètù twètù, aci cidi citùpèesha bukitù bwà kumanya nè cikaadi pabwìpì, cintu kampàndà cidi pabwìpì nè kwenzeka, cyà cinène.

¹⁵ Makèèlèlà dilòòlò, paanyimà pàà disangisha, paanyimà pàà Diyishà, kacya musangu nànsha wùmwe ncitukù mwànji kumòna Nyumà Mwimpè ùlaabakù bantu maanyi mu mùshindù mutàmbe mùdiYe mwenze makèèlèlà dilòòlò

awu to. Tudi bindile dikwàbò, dilòòlò edi. Nènku mpindyewu nwânsambidilaayikù.

¹⁶ Nènku ndi muswè kubala ndambù wa Dìyì dibènèshìibwe dyà Nzambi. Nènku kumpàlà kwà twètù kubala Dìyì, twànji twàkulàayikù Nendè, nè mitù yètù miinyika ànu bwà katanci kakesè cyanààna.

¹⁷ Taatù wa mu Dyulu munanga, nyèwù tulwa Kùdì dilòòlò edi, pàmwápa biikàle ànu bacyòkè ndambù mu mubidi emu, kàdi, kaa, mùshindù mwinè wùdi nyumà yètù mipetè cyashima's wè! Bimanyinu byà Nzambi udi nè mwoyi, byà nè Yèyè ùdi neetù, nè ùtùbènesha, nè ùtùpèesha cyàkalayàYe, byà biyiila nè panshi, byà bibòdyòdyòke, kutàmba byònsò bitùvwà mwà kwenza anyi kwelela meeji abi. Nènku twètù bapetè ngàsà ku mèsù Kwèbè, mu kwitabuuja kwà Mwàn'Ebè, Mukalenge Yesù, tudi baswè kulòmba dilòòlò edi bwà Ùtùmwènèkèlè cyàkàbidì nè mpitù yìbidì yà Nyumà Webè. Swàkù bwà Àpongolodiibwè mu bukòlè bunène nè cipiminu pa muntu yònsò mwab'ewu, bwà kwitabuuja Èvànjeeliyò nè kupeta Bukòlè bwà Nyumà Mwímpè mu nsòmbelu yàbò. Sùngilàku aba bàdi mwà kusùngidiibwa dilòòlò edi, Mukalenge, nè ondòpà aba bàdi badìlongòlòle bwà dyondopiibwa abu. Enzàku nànkù, Mukalenge.

¹⁸ Nè bu mutùdì tumòna bantu bènda bàbwela, biimàne mu biibi, nkàmà nè nkàmà bapangile mwaba mu èkéleeziyà mukesè ewu baye, cidi citùvùlwija nè Yesù Kilistò ùdi umweumwe awu makèlèlè, leelù, too nè kashidi. Bwà nè, mu matùkù àvwàYe mutwendèle pànwápa mu mmwènèkelu wa musunya, musumbà wà bantu ùvwa munène, kabàvwa nànsha mene mwà kufikisha muntu kampàndà kùvwàYe to, nènku bàvwa nè cyà kumupwekeshila ku musàkà wà nzùbu. Nènku tudi tulòmba, Nzambi, bwà nè dilòòlò edi, muntu yònsò udi mudisàke mubwèlè mùshindù ewu àfuciibwè mùvwà muntu awu mufuciibwe.

¹⁹ Bèneshàku Dìyì Dyèbè patùdì tuDibala apa. Nènku swàkù bwà Dìikalè Mwéndù, Bukènkè mu kajila kèètù. Bwalu tudi tulòmba nùnkù mu Dìnà dyà Yesù. Amen.

²⁰ [Muntu kampàndà ùdi wàkula nè Mwanèètù Branham—Muf.] To. Rosella Griffith anyi? [“Èyowà.”]

²¹ Mbafùme ku dimmanyisha ànu mpindyewu nè nsongàakàjì ùmvwà mubiikile mu dindà emu. . . kanwàyi wa maalà à kapyà ùvwa mubiikidibwe mu disangisha dyà mu Chicago awu. Bwalu bìvwa nè yèyè ùvwa musòmbèle mu cisàsà pàvwà Nyumà Mwímpè mwakùle nendè nè kwamba nè ùvwa kanwàyi wa maalà à kapyà. Nè bangàngàbukà bàtaanu banène bàà mu Chicago bàvwa bamulekèle. Bisumbu Byambulwishi byà Bààkanwàyi bìvwa bimulekèle. Nènku wàkabìikidiibwa, ku EMU MMÜDÌ MUKALENGÈ WÀMBA. Ùvwa mwondòpiibwe. Kàtukù mujinge kàbidì dikopo to kwambwila ànu ku cikondo aci.

²² Nè mukwàbò inàbànzà mutekète kuulu ku cisàsà kwàka kumutù kwèndè aku, uvwa umwe wa ku balundà bèndè, bàvwabò basòmbe naabò mu Calumet City. Ní kùdikù muntu kampàndà udi mumanyè cìdici, aci nku mikàlu yà cimenga kùdì kubi kutàmbe nè Paris, mu France, bubì bwà mishindù yònsò bùdi bwènzekakù. Nè bàvwa bamwambile nè ùvwa wènda mushinga wà dyamba, nè yèyè mwinè ùvwa muji wa maja nè Fred Astaire. Ke tatwèndè kucibèngayè. Kàdi kujuukilayè kuulu nè kwamba nè: “Papa, muntu awu’s mmàmbè bushùwà menemene.” Mmusèdìbwe mpindyewu, nsongàakàji mukesè awu, nè ùdi mu njila, yèyè nè bàyèndè, wènda ùyiisha Èvànjeeliyò.

²³ Rosella mmukwàci wa mudimu wà bwambi, ku disangisha dyònsò dyà mu bùlokò nè mwaba wònsò ùdiye mwà kubwela awu, wènda wàmbila baakanwàyi nè kùdi ditèkemena, nè diinè adi didi mu Kilistò.

²⁴ Ùvwa mutàcishìibwe bikolè bwà tatwèndè. Ànu mààyipi ewu, mu muyiiki wà tusunsà dikùmi, wà bàbidi, nsongàakàji ewu mmutù wa masangisha mpàndà, munda mwà bidimu binaayi anyi bitaanu bishààle ebi, mmùdiye mungambile, mu lwàpòlù lukesè lwà tusunsà dikùmi, pambèlu ku màshinyi à cisemuna kwàka, mu muyiiki, ùvwa wàmba nè: “Mwanèetù Branham, cyònsò cyùdi wenza aci, ndi mutàcishìibwe bikolè bwà taatù wanyì. Yèyè mmukunangè, kàdi kî mmuswè ànu kulwa kùdi Kilistò to.”

²⁵ Mèmè nè: “Rosella, Nzambi’s mmumanyè mwà kwenza cyôci aci. Yèyè’s mmumanyè mwà kumufikisha ku dicyenza.”

²⁶ Nè luumù lùdi lùlwa mpindyewu nè mmubàmbila pansì mwinshì mwà dikaadikà didi dyambùle lupèmbà. Tùmusambidilaayi.

²⁷ Mukalenge, mukana mwà mwànà wa bakàji wa lulamatu awu, nè yèyè mukwàcìibwe kuntwaku, ùvwa mwà kufwila mwinshì amu; Nzambi, enzàku bwà nè yèyè kàfu to, kàdi musùùkà wèndè wàtàngilakù muulu nè wàvùluka nè Wèwè udi Nzambi Udi mwà kwandamuna disambila mwinshì mwà mushiki wà lupèmbà amu, ànu mùvwà Wèwè mwà kwenza mu difù dyà mushipa wà bàlenà amu, anyi mu cikùtù cyà kapyà, anyi mu bwinà bwà nyama yà ntambwe amu. Wèwè udi ushààla umweumwe awu. Mupàtùlemù, Mukalenge, mwikàle mwena Kilistò musukula. Tudi bamanyè nè maalu ónsò àdi àkwàcishangana bwà dyàkalenga dyà bàdi baKunangè. Nènkù tudi tulòmba bwà eci cìikalè cimwè cyà ku bintu abi, patùdi tuKulàmbulaci apa, mu Dìnà dyà Yesù. Amen.

²⁸ Mu kubala kwà Dìyi dilòòlò edi, mu Mukàndà wà Bakalenge Mwibìdi, ndi njinga kubala mu nshapità mwi2, bwà kaacyena-bwalu kakesè cyanaànà, bwà kupeta dyumvwija kampàndà, bu Nzambi mwà kwanyisha.

Nènku byàkenzeka, nè pàvwà MUKALENGE mwà kwambula Eliyà mu dyulu mu mvùnda, nè Eliyà wàkaya nè Elishà bùùmukila ku Gilègàlà.

Ke Eliyà kwambila Elishà nè: Shààlà wèwè kaaba aka, ndi nkulòmba; bwalu MUKALENGE mmuntùme mu Betèlà. Ke Eliyà kumwambila nè: Bu mùdì MUKALENGE nè mwoyi, nè bu mùdì musùùkà wèbè nè mwoyi, mèmè ncyàkukushiyakù to. Nànku è kupwekabò ku Betèlà.

Nènku bânà bàà bapròfetà . . . bàvwà bàsanganyibwa ku Betèlà aku kulwabò kùdì Elishà, è kumwambilabò nè: Udi mumanyè nè MUKALENGE neàmbulè mfùmwebè ku mutù kwèbè ditùkù edi anyi? Ke yéyè kwamba nè: Eyowà, ndi mucimanyè; shààlayi . . . bapùwe.

Ke Eliyà kumwambila nè: Elishà, shààla kaaba aka, ndi nkulòmba; bwalu MUKALENGE mmuntùme ku Yelèkò. Ke yéyè nè: Bu mùdì MUKALENGE nè mwoyi, nè bu mùdì musùùkà wèbè nè mwoyi, mèmè ncyàkukushiyakù to. Ke kuyabò ku Yelèkò.

Nènku bânà bàà bapròfetà . . . bàvwà ku Yelèkò kwàka bàakalwa kùdì Elishà, nè kumwambilabò nè: Udi mumanyè nè MUKALENGE neàmbule mfùmwebè ku mutù kwèbè ditùkù edi anyi? Ke kwandamunayè nè: Eyowà, ndi mucimanyè; shààlayi . . . bapùwe.

Ke Eliyà kumwambila nè: Shààla kaaba aka, ndi nkulòmba, bwalu MUKALENGE mmuntùme ku Yadènè. Ke yéyè nè: Bu mùdì MUKALENGE nè mwoyi, . . . bu mùdì musùùkà wèbè nè mwoyi, mèmè ncyàkukushiyakù to. Nènku bônso bàbìdì è kutungunukabò.

²⁹ Mukalenge àsakidilèku mabènesha Èndè ku Dìyì Dyèndè. Cyena-bwalu cyànyì bwà dilòlò edi cìdì nè: *Muntu Mubùikila kùdì Nzambì.* Nènku nènteetè bwà kukòsoloja myàndà ànu nè mwanyì mwónsò, bwalu tudi nè mulongo wà babèèdì munène wùdì wùlonda ànu mu tusunsa tukesè cyanàànà emu, kàdì, ànu bwà kunùpèeshakù mmwènekèlu mukèsè wa matùku atùdì nè mwoyi aa.

³⁰ Tudi tuumvwa lubilà elu ku tudyòmbà, nè mu myaba mishìilèshiilàngàne, nè lùfùmina mu myoyi yà meeji matòòke nè: “Mukalenge, tùpèeshèku ditàbuluja mu cikondo cyètù.” Nè mu mikàndà mimfùndila kùdì beena Kilistò pa buloba bujimà, tudi tuumvwa lubilà alu, nè lùdì lwènza cintu kampàndà mu mwoyi wèbè. Cìdì cìsonsola. Cìdì cìtùntumuna. Cìdì cìfùùlùlula’s, bwà musùùkà, pa kuumvwa bantu bàà Mukalenge bàlòmba ditàbuluja.

³¹ Pèndè’s Nzambì mmwenze mulayì nè: “Bantu bàdì babiikidiiibwe ku Dìnà Dyànyì bóbò badikùngwije pàmwè nè basambile, díbà adi Nèntèéleje mu Dyulu.”

³² Nè pa nàнку twètù, dilòòlò edi, tudi baswè kwelangana meeji pa bwalu abu. Kàdi vùlukàayi, nè, munkaci mwà mbilà yònsò eyi, Nzambi kènà mwà kutùma ditàbuluja kampàndà pàdiYe kàyì mwànji kupeta bantu bakùmbànè mwà kudìtwàla nànsha. Katwèna mwà kupeta ditàbuluja patùdi katùyì bapetè bantu, bantu babiikila kùdi Nzambi, bantu balongesha kùdi Nzambi to, bàdi kabàyi balongèshiiibwe mu bilongelu byà tèòlòji nè dilonga dyà tulaasà to, kàdi bantu bakàyàbàle bàà diitabuuja, bàwà Nzambi mubweje mu cilongelu cyà dilongesha Dyèndè dikàyàbàle adi. Bantu bàdi kabàyi nè bwòwà bwà kukungamangana nè kapyà to! Bantu bàdi babwelè mu Bwikadi bwà Nzambi; nè bamanyè bukolè Bwèndè, nè bamanyè bukolè Bwèndè bwònsò, nè bamanyè bukolè Bwèndè bwà dyondopa! Bàmwe bantu bàdi balongèshiiibwe bwà kumanya Nzambi udi nè mwoyi! Bìdi ànu bimpè bwà kubàlongesha ku Diyì, kàdi: “Dileetà dìdi dìshipa; Nyumà ngudi ufila Mwoyi.”

³³ Nè kumpàlà kwà twètù kwenza ditàbuluja edi, bikèngela Nzambi àbiikilè nè àlongeshè bantu, bantu balongesha kùdi Nzambi, bwà kwambulabò Mukenji ewu. Nènku kabèena bàcyùka cidi dikàndameena to. Bàdi nè budiswile bwà kuya ku cikùtù cyà kapyà mu dicimunyiibwa, anyi ku bwinà bwà ntambwe, anyi kwònsò kùdibi mwà kwikala aku. Mbadilongòlòle bwà kuya, bwalu bàwà mu Bwikadi bwà Nzambi, nè bamanyè nè Yèyè ùdikù. Nànsha biikàle mu bucimunyi anyi mu dicimunyiibwa, bóbò mbimàne ànu mwàbò nè kale. Aci ke mùshindù wà dilongesha dìdi Nzambi ùlongesha bantu. Nè bìdi bikèmesha bwà kwela meeji nè Nzambi mmufwànyine kwenza nàнку, nè Nzambi ùdi ùlongesha bantu Bèndè mùshindù awu, kàdi's ke mùdiYe wènza. Nudi bamanyè's, tutu nè musambu wà kale wutùtù twimba nè:

Bàmwe bàpicila mu mâyi, bàmwe bàpicila mu
nkwaka,

Bàmwe bàpicila mu mateeta makolè, kàdi
bònsò bàpicila mu Mashi.

³⁴ Nzambi ùtu ùlombola bantu Bèndè mu mateeta manène, bwà kubàkezula. Nè misangu mikwàbò bìdi byangata bidimu bwà kucyèna. Nènku bwànyì mèmè, dilòòlò edi, ndi ngèèla meeji nè mpindyewu mene Nzambi ùdi munkaci mwà kulongesha bantu bwà kukungamanganabò nè mwalu wà mvità, bantu bàdi bàpicilamu, nè, cikondo, banyùkùshiiibwe kuumukila ku makàsà àbò. Míngà misangu bimwèke ànu bu nè cintu cyònsò mu kaabujimà cidi munkaci mwà kudishinda, kàdi nànsha nàнку, munkaci mwà byònsò abi, mbamanyè Nzambi udi nè mwoyi awu nè bàshààla batàngile ànu kumpàlà, batùngùnùke ànu nè kuya kumpàlà.

³⁵ Nè bantu bààbùngi bàdi bàsambila bwà ditàbuluja, ndi ndìkonka nè bàdi míngà misangu, bóbò biinè bàdi bàsambila abu, masambila àbò mene ní kaèna imanyika biinà byà mâyi

à mabènesha. Pàdibo batulùmùke nè bàciina bwà kweyemena Nzambi, baciina bwà kuMukwàcila ku Dîyi Dyèndè, bàciina bwà kwitabuuja nè Yêyè ùcidi ànu nè mwoyi leelù ewu, pàdì Bible Wendè wamba bitòòke tòò, nè: “Yêyè ùdi umweumwe awu makèlèlèlè, leelù, too nè kashidi.”

³⁶ Nzambi ùtu ùbiikila, ku mpùùkàpùùkà menemene, bantu bàà meeji matwè, balongè tùlaasà, beena mamanya à mu mitù abu. Bàdi bènza wàbò mudimu, nè bôbò mbantu banène. Kàdi pa ciibidilu pàdì Nzambi muswè bwà mudimu awu kwenjiibwawù, Yêyè ùtu ùpeta muntu udi kàyì nànsha mumanyè ABC to. Kenketaayi Mifundu. Tàngilàayi mu maalu-malonda. Bantu bàvwà benzèlakù Nzambi cintu cyà nsongo kabàvwa bantu bàvwà nè tulaasà tunène tulonga nànsha, kàdi bantu bàvwà, èè, kabàyi nè kàlaasà kalonga to, ànu nè dijinga munda mwà mwoyi wàbò bwà kusadila Nzambi. Yêyè wàkangata cidimè, mulami wa mìkòòkò, mulòbi, cilembi, aba bàvwà basòmbèle mu bufùki abu. Mu ditalala adi nè cinyàanya cyà mu bufùki aci, mwaba awu Nzambi ùvwa mwà kwakula naabò. Nènku's ke bàakabiikilàYe.

³⁷ Nènku pàdibo bàsangana nè, pàdiYe ubiikila mwena mamanya manène à mu mutù, muntu awu ndekeelu wa byònsò ùdi wàlukila ku mmwènenu yèndè yà mamanya à mu mutù ayi. Nènku paanyimà pàà katanci, pàkaadibi bikèngela kwenza maalu à bidikà, mmubwelàkàne bikolè nè bantu bàà pa buloba, bwà kwitaba cintu bu nànkù awu aci. Ki bwà cinyi, ndekeelu wa byònsò ùdi ùkadipeta mu dingumba, nè ùjuuka ùya nè ukadivwija mwambi. Nènku abi's mbîmpè, nè ncyèna cilumbu nè muntu udi mufwànyine kwenza nànkù awu to.

³⁸ Kàdi pàdì Nzambi ùdìlongolola bwà kwenza cintu kampàndà mu bipaapu bitàmbe-mfùkilu, Ùtu pa ciibidilu wàngata muntu udiYè mwà kutèeka dyeyemena Dyèndè mu yêyè, nè ùmulaaba maanyi nè ùmutùma, kàdi kèna nè bwòwà nànsha bukesè to ku mudimu awu. Bantu bàà mùshindù awu ki batùdi tukèngela leelù ewu; kî mbamanyi bàà mabàla bàà kapelu to, kàdi mbantu bàdi bamanyè Nzambi mu Bukolè bwà dibiikà Dyèndè dyà ku lufù.

³⁹ Cileejilu, kùvwa muntu mu Bible, dìnà dyèndè Mòsà, uvwa mupete dilongeshiibwa dyèndè dyònsò. Ùvwa mumanyè tèòlòjì yònsò awu. Ùvwa mumanyè byònsò bìvwà bikèngela bwà kumanyayè abi. Yêyè. . . Bu nè bìvwà bimukèngela dilonga kampàndà dyà tulaasà, ùvwa mwà kulongèsha bamfùmù bàà mu Izàlèlèlè, anyi, mu Èjiipitù. Yêyè kàvwa dijinga nè cintu nànsha cimwè to. Nè Bible ùdi ùtwàmbila nè ùvwa mulongèshiibwe mu lungènyì lwònsò lwà beena Èjiipitù. Mòna's, yêyè's ùvwa mufwànyine kulongesha bamanyi bààbò bàà mabàla. Ùvwa mufwànyine kulongesha beena maalu à mamanya abu, bintu. Yêyè ùvwa munwè too nè bisòtà byà dimanya, pàvwàbi bitàngila maalu à mamanya. Kàdi, nànsha nànkù, byàkakèngela bidimu makùmi ànaayi bwà Nzambi kumupàtulaYè byònsò abi mu

yêyè, lwà mu lusenga mwàmwa. Nènku dîbà dyàkapàtudiibwà mmwènenu yèndè yònsò yà mutù yà dimanya dyà Nzambì munda mwèndè, lwà mu lusenga mwàmwa, cyamù cìvwa cìlongolola bwà kufwimbibwaci.

⁴⁰ Ke mùshindù wùtù Nzambì wàngata bantu bèndè nè ùpàtula bwôwà bônso nè mamanya àbò ônsò àà mu mutù, nènku dîbà adi Mufwimbi Munène awu ùdi ùbèèla ku lukàtā nè ùbanga kubàfwimba cyàkàbidi. Beena mudimu, bakùmbànyine! Mmuntu wa Nzambì. Nganyì udikù mwà kulongesha muntu kutàmba Nzambì Yêyè mwinè? Tàngilāāyì nùmonè mùshindù wùdiYe wùbàlongesha.

⁴¹ Tudi bafwànyine kwela kàbidi meeji ku mukwàbò, dyèndè Davidi. Nzambì ùvwa munkaci mwà kulongesha Davidi pacìvwāye ànu mwānā mutekète. Mupròfetā Samwèlè kusemena kulwayè nè kumupòngolwelayè maanyì pa mutù, nè kumulaabayè maanyì, bwalu Nzambì ùvwa nè cyà kulongesha Davidi bwà kwikalayè mulwanganyi wa mvitā wa bukolè. Kàdi tàngilāāyì dilongesha dyàkamupèèshāYe.

⁴² Mwva mbala, kùkaadi cikondo kampàndā, lwà ku Green's Mill eku, kùntù pa ciibidilu nya kasambila, mùvwā Nzambì mwambile Davidi nè: “Ndi mukwangàcile ku cisumbù cyà mikòòkò, kùvwā wenda ulonda mikòòkò mikesè yà tatwèbè ayi kuntu kwàka, nènku Mémè ndi mukuvwijè dīnā dinène bu bantu banènè bàā pa buloba.”

⁴³ Nènku ndi ngèlā meeji ku dilongeshiibwa dikàyàbàlè dyàkenzelāye kùdi Davidi adi. Kacya Yêyè kàtukù nangananga mumubweje mu cìlongelu kampàndā to, kàdi Wàkamulongeshila mu cìlongelu Cyèndè Yêyè mwinè. Davidi ùvwa cilembi nè mulami wa mikòòkò. Nè mu Misambu mmufundè bwà lutende lubishi nè māyì matalāle, bwalu mwômù amu ùvwa nkāāyèndè, pāā nkāāyèndè. Kāvwa mupīike twīshì nè bintu byā pa buloba to.

⁴⁴ Nzambì ùdi nè cyà kuumusha muntu ku bintu byā pa buloba, bwà Wàmōna mwà kumufikisha ku ditùkijakù, bwà wàmōna mwà kutèèleja Nzambì, Dīyì dikesè dipòle adi. Dîbā adi, pādīye ànu ùtwillangana nè Nzambì, dîbā adi ùdi ùlwa kàyì nè bwōwā to. Mōnaayi nè yêyè kēna ùcyūka cidi muntu kanā yōnsò ewu wàmba to; ùkaatukù mu Bwikadi bwà Nzambì. Mmumanyè Nzambì mu Bukolè bwà dibiikā Dyèndè dyà ku lufù.

⁴⁵ Nè pashīishe, Davidi, tudi tumumōna. Dīngā ditukù, Nzambì wākanyishila ours bwà kubwelayè nè kwangata umwe wa ku mikòòkò yèndè. Davidi kulondakajayè ours awu. Kakūyì mpatā to wàkasambila, bwalu katancì kakesè pashīishe wākacijikula. Nènku wàkasambila nè kulòmbayè Nzambì. Yêyè ùvwa mulami wa mikòòkò ayi. Kāvwa mwà kujimija mùkòòkò awu to. Nè yêyè ùdi nè cyà kusungila mùkòòkò awu, nānsa byā kumōna lufù. Ke kupyāye ndundu wèndè mukesè wa nyuunyi awu, nè

kulondakajayè ours awu nè kumushipa. Ùvwa nè cyà kusùngila mùkòòkò awu. Nudi numòna civwà Nzambi ùmulongeshila anyi?

⁴⁶ Nzambi mmuswè bwà balami Bèndè bàà mìkòòkò bàsungilè mìkòòkò, cidiye nè cyà kwikala mubiikidiibwe nànsha ciikàle cinyi nè cidiye nè cyà kupicilayèmu nànsha ciikàle cinyi. Sùngilàku mìkòòkò ayi!

⁴⁷ Dìbà adi Yèyè wàkamòna nè Davidi ùvwa nè bukitù kumutù kwà ours ewu, pa nànkù Wàkasàkidila ànu bukolè bwà nyama awu ndambù, kàdi kutùmaYè mwànà wa mùkòòkò...nyama wa ntambwe kubwelayè nè kukwàtayè umwe wa ku bàna bàà mìkòòkò.

⁴⁸ Nè nyama wa ntambwe n'nyama wa lonji. Kaa, mu Àfrikè, pàmvwà ngènda nyilemba...Ntambwe ùdi mwà kushipa bantu dikùmi kumpàlà kwà wèwè kwamba nè: "Jack Robinson." Kaa, nyama wa bukolè bwàbùngi, munène! Ànu nè mukungulu munène cyanààna, bantu bàfwa. Nènku muntu udi ufwa ku bukolè bwà nyama wa ntambwe kàtu ùmvwa bimusaama to. Mbówà bukolè, paùdi uumvwa mukungulu ùdiye ùkungula awu. Makàsà manène à nyama minène awu, ànu mu kasùnsukila kàà kasunsa cyanààna, ùkaadi musùnsùle bantu dikumi nè bàbidi.

⁴⁹ Kàdi pa kwela meeji, bwà mwànà mukesè wa balùme awu's! Bible mmwambè nè yèyè ùvwa nè mubidi "mukùnzùbile." Mbwenà kwamba nè ùvwa...ànu kakwàcikwètù kakesè menemene, nè ndundu mukesè wa nyuunyi. Nudi bamanyè cìdici's, kapese kakesè kàà cisèbà kiikàle nè kanshinga ku luseke nè ku luseke. Kàdi nyama wa ntambwe mwikàle nè nzala, mumanè kwikala nè mwenya wà mashi mukana mwèndè, kubwelayè è kubàkulayè mùkòòkò. Davidi kubàndishayè mèsù muulu kùdi Nzambi, è kwamba nè: "Ncyèna mwà kujimija ewu to. Wèwè nkwàcishèku, Mukalenge." Ke yèyè kubyànkula nyama wa ntambwe awu panshi, nè ndundu wa nyuunyi. Nènku pààkajuukà nyama wa ntambwe bwà kumulwisha, mwànà mukesè wa balùme awu, nè nyama wa ntambwe mwikàle nè bujitu bwà kilò mitwè ku nkàmà yibidi nè makùmi àsàtù, anyi mipite apu, mwànà mukesè wa balùme awu mwikàle nè bujitu pàmwapà bwà kilò makùmi àsàtù anyi makùmi ànaayi. Kukòkayè, ku mukàbà wèndè mukesè aku, keelè. Nènku pààkajuukà nyama wa ntambwe awu, uvwa mwà kushipa bantu dikùmi mu dibàtuuta makama àbidi, yèyè è kupyà nyama wa ntambwe awu ku mwedi wèndè aku nè kumushipayè.

⁵⁰ Bukitù! Nzambi kàtu muswè batulùmùke to. Kèna mwà kukwàta neebè mudimu to wèwè nè bwówà bwà kwangata Dìyì Dyèndè nè kuMwitabuuja. Yèyè mmuswè bantu bàà bukitù, bàdi kabàyi bàtèya ntèmà ku cintu nànsha cìmwè to ànu ku cidi Mukalenge wàmba. Bàà mùshindù awu ke bàdiye mwà kukwàta naabò mudimu. Cidi èkèleeziyà wàmba nànsha ciikàle cinyi,

cidi mpaasàtà wàmba, cidi èkèleeziyà útwa nyama ku mikòlò; yèyè útwa útwa ku cyà Nzambi nè bwakàne, nè Diyi Dyèndè. Ke bantu mbòbò abu batùdì. . . biikalà Nzambi mwà kutùma mu matùkù aa bwà ditàbuluja Dyèndè didi bantu Bèndè munkaci mwà kusambidila.

⁵¹ Paanyimà pàà bidimu, pàakayàye bwà katwilangana nè bânà bààbò ku mvità, kùvwa muntu munène wa mfyondo wa kale kuntwaku, nè minu bule bwà decimètres yisàtù nè citùpà. Nè ùvwa ùfuuna, nè wàmba nè: “Mpindyewu muntu kampàndà àlwe àlwanganè naanyi. Nwènù mwà kuntuuta, nèndifilè, anyi ewu anyi mukwàbò, nè netùnùsadile.” Ewu yònsò udi udilekelela awu neásadilè, mu bushùwà bwà bwalu, neikalè ewu udi ujimija.

⁵² Mùshindù awu ke wùtù dyabùlù muswè kucyènza. Pàdiye wèla meeji nè mmùkutàmbe, neàkwambilè nè: “Kwèna mwà kupànduka nè aci to. Kwèna mwà kuyiisha dyondopa dyà kùdì Nzambi mu èkèleeziyà wa ba-Méthodistes, èkèleeziyà wa ba-Baptistes to.” Èè, nwènù bayiishi bàà ba-Méthodistes shààlaayi ànu bakwàte Nzambi musangu wùmwè, nè nùjandula ní nudi mwà kucyènza anyi to. Uh-huh. Kanwèna mwà kucyènza nè tèòlòji wenù udibò bàlongesha awu nànsha. Nudi nè cyà kushààla bakwàte Nzambi nè kumanya nè Yèyè ùdikù.

⁵³ Bàdi bàmba nè: “Beena Mpenta.” Kùkaadi ndambù wa bidimu, kùvwa musumbà wà bantu biimàne mu ditumba, kabàyi nànsha mene nè—nè nzùbu uvwabò mwà kubwelelamù to. Kàdi nuvwaku babale cikandakanda cyà *Life*, ditùkù adi, cyàkambàbo bwàbò bòbò anyi? Ncimwè cyà ku bintu byà bitàmbe bunène bikaadiku cikondo eci cimanyè, ndijuuka dyà èkèleeziyà wa beena Mpenta. Ncyà bushùwà menemene. “Nè bàdi bàpeta bantu bààbùngi bakùdimùne mucima mu cidimu cimwè kutàmba mùdì èkèleeziyà yònsò yìpeta, misangisha pàmwè.” Ke cìvwà cikàndàkàndà cyà *Life* cyambè. Bwà cinyi? Bàdi mwà kwikala mu cibwejàkàjì mu bintu kampàndà, kàdi, mwanèètù, bàdi nè bukùtù; biimàne pambèlu pàapa, batwàngàne nkundù, nè biikàle bàbiikila cifiike nè “ncifiike” nè citòke nè “ncitòòke.” Ndekeelu wa byònsò pààbwayika ditàbuluja, nedibwayikè munkaci mwàbò. Tàngilàayi nùmonè ní kabyèna nànkù. Nebàlongolodiibwè, dimwè dyà ku matùkù àdì panshì aa.

⁵⁴ Kàdi, Davidi’s. Pàakamuvwàdikà Shawùlà byà mvità byèndè pambidi, nè kwamba nè: “Davidi, wèwè ukalwangana nè muntu wa mpolondo ewu,” yèyè nè: “mòna’s, wèwè’s udi ànu mwànà wetù wa balùme ewu’s, ànu citende cyanààna, kàdi yèyè mmulwanganyi wa mvità kacya ku bunsongà bwèndè, mmunyi mùdikù mwà kulwàngana nendè mvità?”

⁵⁵ Tèèlejàayi Davidi mukesè ewu. Nudi numòna’s, yèyè kàakacyàmbe mùshindù ewu to nè: “Shawùlà, wa kuneemekiiwa, mukalenge. Taatù wanyi ùvwa mmuntume mu cilongelu cyà tulaasà tupwekèle, mu ciikadilu, mu tulaasà

tutumbùke. Ndi nè Ph.D. Mémè—mémè—mémè's ndi mudipàye mu mudimu bwà kwenza cyòci eci. Mémè's ndi muntu wa meeji matwè." Kacya Yèyè kàtuku mucyambè nàнку to.

⁵⁶ Yèyè kwamba nè: "Mukalenge wanyì," yèyè nè, "pámwà munkaci mwà kudiisha mikòòkò yà taatù wanyì kuntu kwàka apu, ours kubwela nè kukwàtayè ùmwè, ke mémè kumushebeya. Nè nyama wa ntambwa kubwelayè è kukwàta wùmwè, nè ngàkamubyànkula panshi. Nèku pààkajuukàye kuulu, ngàkamushipa." Ke yèyè nè: "Nzambi ùvwa munsungile mu makamà à nyama wa ours nè nyama wa ntambwe awu, ùdi kàbidi mwà kunsungila mu byanza byà mwena Peleshètè udi kàyi mutengula wàwa." Muntu mulongesha kùdi Nzambi's!

⁵⁷ Ke Shawùlà awu mwimàne nè dilongesha dyònsò òvwa muntu kanà yònsò ewu mufwànyine kupeta adi, bwà kumanya mwà kulwangana. Davidi kàvwa mumanyè kantu nànsha kàmwè pa bìdi bitàngilà mwelè wà mvità to. Kàvwa mumanyè kantu nànsha kàmwè pa bìdi bitàngila ngabu wa mvità to. Èè, Shawùlà ùyidile è kumuvwàdikaye byà mvita byèndè binène abi, nè Davidi mukesè awu ùvwa mwimàne mikòlò yàmba kukònyangala. Kusanganabò nè nkooci wendè wa butèndeledi kàkakumbana mulùme wa Nzambi to; wàkamuneemena ànu bujitu. Nèku twitabàayi yètù yònsò nè bikwàbò kabyàdyàkukumbanangana nè byamù byà mudimu byà Nzambi kuntu kwàka to.

⁵⁸ Kaa, mùshindù mwinè wutùdi bafwànyine kutungunuka, nè kwamba byàbùngi, bwà bààbùngi bashiilèshiiàngane. Kàdi, tùyaayi buludi ku cyena-bwalu cyètù, bwà kulwijakaja.

⁵⁹ Eliyà ùvwa wènda ùkùlakaja, nè yèyè ùvwa mumanyè nè kabivwa mwà kunenga ntàntà mule bwà yèyè kuumuka pa buloba to. Nèku Nzambi wàkasangana muntu uvwa muntu wa meeji matòòke, ùvwa muntu mwimpè. Dìna dyèndè ùvwa Elishà. Mpindyewu, bu nwènù mwà kumòna, umwe wa ku bòbò abu dyèndè's ng'Eliyà nè mukwàbò ng'Elishà.

⁶⁰ Mpindyewu, yèyè kàvwakù mubwelè mu mmwènekeli, nè bikwàbò to, nè muyè kasangana mu bilongelu byà tèlòlji, nè lwà mu bilongelu binène bitumbùke byà mu matùkù awu abi. Cyàkenzàye ncinyi? Wàkaya mu budimi nè kusangana muntu mwikàle ùdima nè ngombe yà cikòkedi dikùmi nè yibidi. Cinyi? Elishà, ewu ùvwa ùdima nè ditempu dyà nkàsu awu, ùvwa mumanyè mwà kwanyisha mulongo mululàme. Nè ùvwa mumanyè nè bu yèyè mwà kukùdimuka bwà kutàngila paanyimà, ùvwa mwà kukònyangaja njila. Nè Nzambi ùvwa mumanyè nè muntu uvwa mumanyè mwà kwela dibùulà dilulàme, ùvwa mumanyè nè kabivwa bikèngela mwà kukwàta byanza ku ditempu òvwa ngombe yidima naadi kàdi kutàngila paanyimà to. Yèyè kààkindila too nè pààkapètaye dilonga dyèndè dyà tulaasà, wènda ùkònyangaja njila nànsha. Yèyè

wàkashipa ànu ngombe è kufilayè mulàmbù, è kulondanganayè nè Eliyà, pàakayà ànu cinkutu aci pambidi pèndè. Ûvwa mudilongòlòle, mwanyishe. Nzambì ùvwa mumanyè nè ùvwa mwà kumuvwija mukùmbàne.

⁶¹ Mpindyewu, bìvwa bìkèngela bwà Nzambì àmupèèshè dilongeshiibwa kampàndà. Ûvwa mulongèshiiibwe mùshindù wà kushààla kacya wàtàngija mèsù èndè pa dibùùlà, nè ditempu dyà ngombe dikùmi nè yibidi adi, kàdi muntu umwèpelè wènda ùdima naadi. Yèyè wàkamulongesha ndambù wa lutùùlù, nè mwà kwikalayè nè lutùùlù, nè kulongesha ngombe ayi bwà kwendelayè buludì mu mulongo.

⁶² Byàkakèngela bwà kulongeshayè bàmwè bantu, pashiishe; kubàlamina pa Bible, pa Dìyi, baswikàkàne nè Nzambì, bashààla ànu mu mulongo.

⁶³ Nènku, dībā adi, byàkakèngela mene bwà Nzambì kumulongeshakù kàlaasà ndambù. Yèyè nè: “Mpindyewu wèwè indilà kaaba aka, bwalu nyaaya ku—ku Gilègàlà. Mukalenge mmumbiikile.”

⁶⁴ Nènku mupròfetà, paanyimà pàà yèyè mumanè kuumvwa Bukolè abu pambidi pèndè, mùzàbì wà Eliyà awu, kwambayè nè: “Bu mùdì Mukalenge nè mwoyi, nè musùùkà wèbè nè mwoyi, mèmè ncyàkukushiyakù to.”

⁶⁵ Kutùngunukabò too nè ku Gilègàlà, udi mwa—mwaba wa dijikula dyà bwena Kilistò nè dibàtiiza awu. Ke pashiishe kwambayè nè: “Shààla wèwè ànu kaaba aka mpindyewu. Eci ncimpè mu mùshindù mukùmbàne. Udi mwenzè ditonda nè dibàtiiza. Eci ncimpè mu mùshindù mukùmbàne. Nènye ku *Betèlà*,” mbwena kwamba nè, “nzùbu wa Nzambì.”

⁶⁶ Mpindyewu, aci’s ncifwànyine kwikala ànu cimpè bwà balongeshi bààbùngì. “Kaa, ndi mfùma ku dibwela mu èkèleeziyà nè kubwela mu bwobùmwè. Bwà cinyi kubènga ànu kushààla kaaba aka?”

⁶⁷ Kàdi, tèèlejàayi, Elishà kàvwa mwà kwela meeji awu mùshindù to. Yèyè ùkaavwa mumanè kuumvwa Bukolè bwà Nzambì. Ûvwa mumanyè nè kùvwa byàbùngì bikwàbò bwèndè yèyè. Ke yèyè nè: “Bu mùdì Mukalenge nè mwoyi, nè musùùkà wèbè nè mwoyi, mèmè ncyàkukushiyakù to.” Kaa, mùshindù mwinè wùndì muswè aci’s wè!

⁶⁸ Ke kuyayè too nè ku, Betèlà, too nè ku nzùbu wa Nzambì, nè kwòkù aku kusanganayè musùmbà wà bamanyi bàà mabàla. Bàvwa bònsò bayiishi balongèshiiibwe bìmpè, nè bàvwa bànyùnguluka bàmwambila, bàmba nè: “Mukalenge, udi mumanyè mùdì bwalu anyi? Bwèbè bwalu mbutwè ku cibùngùbùngù. Udi mumanyè nè Eliyà neikalè mwà kuumushiibwa kùdì anyi? Yèyè ùkaadi mutàmbe kukùlakaja. Kèna mwà kushààla nè mwoyi ntàntà mule menemene to. Eliyà

neàngaciibwè, nè wêwè neùshaalè mwimanè mwaba awu bu mukoleshi wa maalu.”

⁶⁹ Lekèlaayi nnwāmbilèku cintu kampàndà mpindyewu. Muntu ukààdikù kacya mulabùle Nzambi, kààkwikalakù muswè, anyì, kènà mwà kumana nyòòtà yèndè ku ciinà cyà mâyi ckwàtakaja kùdi bantu to. Kèna mwà kucyènzakù to. Mwab’awu, tèòlòjì wabò yònsò uvwabò nendè mu cilongelu cyà bapròfetà kuntu aku awu, kì mmufwànyinekù kumana nyòòtà yà muntu wa Nzambi, ukààvwa mulabùle Nzambi awu to.

⁷⁰ Kàdi bàvwa ànu batùngùnùke nè kumutwishisha nè: “Kaa, s’bivwa bikèngela wêwè kushààla apa. Nènkù, mònà’s, mu mbingu yisambòmbò tudi mwà kukupèèsha webè Ph.D. Nènkù, nudi bamanyè’s, kì mbifwànyine kunenga to, nè muwàngàta bidimu bu binaayi byà dilongeshiibwa mwab’ewu, nènkù tudi bafwànyine kukupèèsha bukenji bwà kuyiisha. Udi mumanyè’s, wêwè mujaadike nè udi ànu bimpè, tudi bafwànyine kukutùma mu dīgumba dyètù twètù.” Aci kacýàkusànkisha muntu wa Nzambi to. “Netùkulongèshè bwà wêwè kwikala mwambi, bu wêwè ànu mwà kushààla neetù bidimu bu binaayi anyi bitaanu nànkù awu.”

⁷¹ Kàvwa nè díbà bwà cintàkanyì cyà mùshindù awu to. Ùvwa mu njila mutàngile ku Mpokolo awu. Yèyè ùkaavwa mumane kulwa kumutù kwà cyòci aci. Ùkaavwa mumane kupeta mwenya wà mu Dyulu mu musùukà wèndè.

⁷² Ke yèyè nè: “Udi mumanyè nè mfùmwebè neùmushiibwè anyi?”

⁷³ Kàdi tèelejàayi cyàkambàye’s. “Èyowà, ndi mucimanyè. Kàdi shààlaayi bapùwe.” Mu ngaakwilù mukwàbò nè: “Dyàyi nsubilà. Kanùteeci kungambila abu bwalu to. Kanùteecikù bwà kungambila cìndi ngèza to. Ndi mumanyè kúnyaayà nè cìndi ngènda ndonda.”

⁷⁴ Nzambi, tùpèèshèku bantu bàà bu nànkù awu, bantu balongesha kùdi Nzambi bàdi bamanyè mwà kubènga kulaluka mu njila bàtwa *eku* bàtwa *kwàka*.

⁷⁵ “Ndi mumanyè kúnyaayà. Nènkù kanùngambidiku bwà bwalu abu to. Shààlaayi ànu badyè nsubilà. Kùteeci bwà kuntekesha mu mabòko to, bwalu kabyàkwikala nè dikwàcisha nànsha dikesè to.”

⁷⁶ Kaa, bu bantu bàdibo basambidila mwà kwikalakù nè mwoyi mukolè wà mùshindù awu’s wè!

⁷⁷ “Kaa, matùkù à bishimà àkaadi mamanè kupìta. Aci kacivwa cyà bushùwà to. Tàngilàayi, neùsaamè kàbìdi.”

⁷⁸ “Dyàyi nwènù ànu nsubilà. Kanùngambidiku cintu nànsha cìmwè pa bwalu abu to. Ndi munkaci mwà kutùngunuka. Ditàbuluja dilwalwa. Nzambi ngudi mucilayè.” Kaa, nwènù bàna bàà balumè bàà Nzambi, bwelàayi mu cipaapu aci kuntu

kwàka, kanùyì bwôwà to. Kanùyì bwôwà to! Kwàtaayi Nzambi ku Díyì Dyèndè.

⁷⁹ “Ndi mumanyè nè yêyè—yêyè neikalè nè cyà kwambwibwa. Kàdi kî ng’aci cîndi... Kanwèna nè cintu nànsha címwè mwab’ewu cìdi cînsakisha to. Mâpòlomè ènù ônsò nè Ph.D. ayi’s nè Dìpòlomè dyà licencié, nè bintàkanyà byônsò ebi, kabyèna bìnsànkisha to. Shààlaayi nwènu ànu bapùwe.”

“Èè, neùkataayikè kuntwaku.”

⁸⁰ “Èè, mèmè mutaayike, ndekèlaayi ntaayikè. Ndi mu njila wanyì.” Mutùngùnùke, wènda ùya.

“Kwèna mwà kucifikisha ku disambuka to.”

⁸¹ “Ndi mumanyè nè ncyèna mwà kucijikija to, kàdi Nzambi neànsabwishè,” mwàkambàye.

“Èè, Elishà ùdi ùya ku Yadènè.”

“Ndi nya nendè.”

Nzambi ùdi ùlomba Yadènè mu mwoyi nè mwoyi wònsò.

⁸² Pa nàнку, Elishà kulwayè mwaba awu. Kwambayè nè: “Mpindyewu, Elishà... ” Eliyà wàkambila Elishà nè: “Wèwès udi ànu nsongààlùmè,” pàmwàpa cintu bu nùнку ewu: “nènku mu bulelèlè kwèna mulongè kàlaasà nànsha kakesè to.” Mupròfeta wa kale awu ùvwa ùteeta bwà kumwela diteeta. Yèyè nè: “Ucìdi ànu nsongààlùmè. Kùvwa mulongè kàlaasà kààbùngì to. Mòna’s, kwèna... Cidi, mu bushùwà, kwèna mulonge kàlaasà kashàadile kèètù aka to. Cintu címwèpelè cyùdì mumanyè mwà kwenza cìdi ànu kudima nè ditempu dyà nkàsu. Pa nàнку mbipiciùbwe nè wèwè mushààle kaaba aka, nè mwikàle mwà kupeta dipòlomè dyèbè dyà Licencié. Nwamònu anyi? Mbimpè ùshaalè apa nè ùpetè dipòlomè dyèbè.”

⁸³ Kàdi kî ng’Elishà to, kî mmuntu uvwakù musangu kampàndà mulongè Nzambi awu to, mûmvwe Bukolè bwà dilaabiibwa abu pambidi pèndè. Yèyè nè: “Ànu mùdì Mukalenge nè mwoyi amu, nè musùukà wèbè kawùyikù wùfwa to, mèmè ncyàkukushiyakù to.” Yèyè ùvwa nè kiipàcìlè kampàndà. Yèyè wàkamòna cikèènà-kumòna. Ùvwa mumanyè cìvwà mwà kwenzeka.

⁸⁴ Nènku bònsò bàbìdì kupwekabò ku Yadènè. *Yadènè* mbwena kwamba nè “lufù.” Kì bóbò abu biimàne, mununu nè nsongààlùmè. Cidi bulelèlè cileēja Kilistò nè Èkèleeziyà Wendè. Nènku kî bóbò abu biimàne, ku luseke lwà Yadènè aku. Kì yèyè awu, ùpàtukila mu tukùnà twà mu Yùdaaya, bibila binène bìvuma mùshindù awu. Nè Elishà, nè nsukì yèndè mitòòke ayi mimupwekèle paanyimà, nè mèsù èndè mabwicidile à kale awu matàngija dyàmwàmwà dyà Yadènè... Nè nsongààlùmè awu ùjòja dinyungakana dyònsò dìvwàye mwenzè. Umwe, nsongààlùmè wa citende awu, uvwa mwindile cikèènà-kumòna, bwà kutùngunuka nè diswa dyà Nzambi.

Mukwàbò ùvwa wàlukila Kumbèlu. Bùbìdì bwàbò bàvwa ku Yadènè. Elishà, bwèndè yèyè... Ùdì wàlukila Kumbèlu.

⁸⁵ Elishà ùvwa nè nsòmbelu wa lutàtu. Mukàjì muiyishi awu kuntwaku ùvwa mumupèeshe ntàtu kayiyi kubala, Izàbèlè nè Aakàbà. Nè mabwe nè byònsò bìvwàye ùpicilamù abi! Elishà ùkaavwa wènda ùcyòka. Nè ùvwa mumanyè nè ùvwa mulwangàne mvità mimpè, nè ùvwa mujikijè lùbilu. Ànu dyàmwàmwa dyà Yadènè ke mùvwà diikisha dyèndè.

Kàdi Elishà ùvwa mwindile Nyumà ùvwa pambidi pèndè awu.

⁸⁶ Nànkù, bu nwènu mwà kumòna, mwena kwitabuuja yònsò, paùdì ufika mu mùshindù wà bikèngela bwà wèwè kulekela byònsò, neumvwè mavwala à Yadènè àkutuuta ku makàsà kwèbè. Udi uya dyàmwàmwa anyi, peeshi kwèna uya? *Yadènè* ùdì ùmvwija “ditàpuluka,” utàpulula.

⁸⁷ Nè lwà paanyimà pàà kakùnà apu pàvwa piimàne bayiishi aba, banànùkila, munkaci mwà kwela Elishà mbilà mikolè nè: “Mbimpè wèwè kubènga kuya dyàmwàmwa. Neùlalu.” Nutu nuatèeleja, mèyi à kadyùwù awu, àcidikù, leelù ewu.

⁸⁸ Èè, Elishà kwambayè nè: “Piikalàbi nè Nzambì ùdì Nzambì, nè awu mmupròfeta Wendè, bikèngela ngàngatè kaaba kèndè, nè ndi dijinga nè nyumà wèndè bwà kucyènza nendè, ncyèna dijinga nè cilongelu cyàbò aci to. Bu nè cilongelu cyàbò cìvwa cìfwànyine kwikala cicyènzè, bàvwa mwà kwangata kaaba kèndè. Kàdi Nzambì ngudi mumbiikile bwà kucyènza, nè mèmè ndi dijinga nè nyumà wèndè.”

⁸⁹ Bu bilongelu byà maèkèleeziyà mwà kwikala byangàte kaaba, nè Bukolè bwàkafilà Yesù abu, nùnkus mbabwangàte, kùkaadi bidimu; ba-Méthodistes, ba-Baptistes, beena Kàtòlikè, ba-Presbytériens. Kàdi kabàakucyènzakù to.

⁹⁰ Bìdì bikèngela Nyumà wa Yesù Kilistò! Nènku neùsabukè Yadènè, wa dīgumba nè dīgumba dyònsò kudishiya paanyimà, nè bikwàbò byònsò, nè newìmanè nkààyebè nè Nzambì.

⁹¹ Pa nànkù, yèyè wàkiimana nendè ku Yadènè aku. Elishà mutàngile kuntwaku, mumanyè nè, mwaba kampàndà dyàmwàmwa adi, Nzambì ùvwa mwà kutwilangana nendè. Ke kukòpolayè mùzàbì wèndè, nè kukènzakanayè kùvwà nsongàalùmè awu. Nènku kutuutayè Yadènè. Nè pàkenzàye nànkù awu, Yadènè wàkakànguka. Nè bàkendelapu, pa buloba bùmè.

⁹² Nwamònu's, Yadènè kí mmubì bikolè to, twamb'eku twamb'eku, piikalàku Cintu kampàndà neebè bwà kukàngula njila.

⁹³ Kaa, pààkafikàbo ku luseke lukwàbò! Ku kaacipuka nè kaacipuka kwònsò kùvwa kuswikila kàbalù nè dikalù dyà mvità. Mfùmù wa bamfùmù ùvwa mutùme musùmba bwà kubàndawù

ùfùnda Mikàndà yàbùngì yà Dipungila Dipyadipyà. Nwamònu anyi? Nzambi ùtu ùkèba bantu. Ùvwa nè muntu kampàndà uvwaYè muswè bwà kufùndayè Dipungila adi, pa nànkù Yèyè wàkasungula ànu Pòlò. Ke kupàtulaYè ànu tèlòlòjì wendè yònsò awu munda mwèndè. Ke Pòlò kwambayè nè byàkamukèngela bwà kupwàye mwoyi byònsò bivwàye mumanyè abi, bwà kuyiila Kilistò.

⁹⁹ Nzambi leelù ewu ùdi ùteeta bwà kupàtula bwena pànu bwònsò munda mwètù, nè kutùfikisha ku didìshìya twètù biinè munda mutupù, nè kwikala balùme nè bakàjì bàdì kabàyi nè bwòwà nè banange Nzambi, nè biikalè bàshààla nè Nzambi, nè biikalè mwà kusabuka mulongo wà mukàlù, Yadènè, bwà Wàmòna mwà kukwàta neetù mudimu bwà butùmbi Bwèndè.

¹⁰⁰ Ke dībà ndyòdì edi dīndì muswè bwà nwènù kwelangana meeji bikolè. Nè pawikalà kacya kùyikù mwanjì kusambuka mwaba ewu to, pawikalà kacya kùyikù muye dyàmwàmwa dyà mulongo ewu to, mwaba wùcidì wèwè ànu wamba nè: “Èè, wanyì mààmù ùvwa wa mu èkèleeziyà kampàndà.” Abi’s mbìmpè. Aci kacyeà cyàngata kaaba kèèbè to. Nwamònu anyi?

¹⁰¹ Nzambi ùdi ùbiikila balùme nè bakàjì, leelù ewu, ku mwalu wà mvità. Yèyè kèna ùbàbiikila ku Gilègàlà to, anyi Yèyè kèna ùbàbiikila ku Yelèkò to, anyi ku Betèlà. Ùdi... Nebàbutukè. Kàdi Yèyè ùdi ùbàbiikila bwà kusabukabò Yadènè, bwa Wàmòna mwà kukubweja mu cilongelu cyà Bukolè Bwèndè Yèyè mwinè, nè kukuvwija nè kukufwimba.

¹⁰² Tàngilàayi cidìYe munkaci mwà kwenza kaaba aka mene mpindyewu, ùtùma Nyumà wa Mwàn’Èndè. Ùdi munkaci mwà kwenza bimanyinu nè maalu à kukèma nè bishimà, bìdì bàà pa buloba kabàyiku bamòne bidimu binunu bibìdì byà ndekeelu ebi to. Beena maalu à mamanya mbaCikwàte fòtò, Dikunji dyà Kapyà, Mwanjèlò wa Mukalenge. Mmukùdika mu Washington, DC, dilòlòlò edi, mu cibambalu cyà dibandila dyà mpìngù nè bimfwànyì byà maalu à ntèndeelèlu, ke Cintu citàmbe-mfùkilu cimwèpèlè cikaadiku kacya cijaadikiibwe nè ncikwàciibwe fòtò kùdì maalu à mamanya. Ùdi ùpàtula bimanyinu Byèndè bimwèbimwè abi nè maalu à kukèma.

¹⁰³ Ncinyi aci? Ndisabuka dyà Yadènè. Nkushààla nkààyeebè nè Nzambi. Kudyàdija mu cikùtù Cyèndè cyà kapyà Sungasunga bwà kukezudiibwa. Kubwela ku lukàtà lwà Mufùmbi Munène nè kuMulekela ùkufwimba. Dilòlòlò edi, patùcidì mu disambila apa, patùkaadì tufika pa kaaba aku apa, ditèèkè wèwè ànu pa lukàtà Lwèndè apu, wamba nè: “Mukalenge, mmèmè ewu. Mfwimbaaku ùmvwije mu mùshindù Wèbè Wèwè mwinè.” Nènku Nzambi neàcyènzè.

¹⁰⁴ Patùdì twinyika mitù yètù ànu bwà katancì kakesè cyanààna bwà mwàkù wà disambila apa. Ànu kumpàlà kwà disambila, ndi njinga kwelakù bantu lukonko elu munda nè pambèlu.

Mbanganyì kaaba aka nè meeji matòòke ônsò bàdì baswè kuya nè Yesù too nè ku Yadènè, dilòòlò edi, nè kusabuka kuntwaku kúvwà mwà kumòna cìkèèna-kumòna nè kumòna cìvwà Nzambì úswa kwamba menemene anyi? Nudikù mwà kwela byanza byènú muulu anyi? Nzambì ànùbènèshè. Tàngilàayi ànu cyanaàna! Ngèèla meeji nè kùdì byanza nkàmà yìbìdì mu nzùbu emu, byela muulu. Kupweka ku Yadènè, kí nkupweka mu sèminère to. Èlishà wàkashìya mwaba awu ànu ku luseka.

Bòbò kwamba nè: “Shààla mwab’ewu.”

¹⁰⁵ Yèyè nè: “Ncyèna muswè kushààla to. Aci ncikwàtakaja kùdì bantu.” Aa, kacyàkumanakù nyòòtà yà muntu udi nè nyòòtà yà Nzambì ayi to. Dilabula dyà ku sèminère nànsha òmwè, màpòlomè à licencié nànsha—nànsha òmwè, anyi bikwàbò, kabyàkukùmbanakù to, kabyàkukùmbanakù bwà kumana nyòòtà ayi to, too nè paùdì unwà ku Mpokolo wa Mwoyi awu.

Nwènú bèdì byanza muulu abu, sambìlaayi pàmwè naanyi mpindyewu.

¹⁰⁶ Nzambì munanga, mu tusunsa tukesè etu twà mudimu, balùme nè bakàjì biimàne ku myelelu yà bimanu, bàna bàà balùme nè bàà bakàjì; nè pambèlu apu, beeyèmene ku màdidiishi; luuyà lukolè. Kàdì nànsha nànkù kùdì cintu kampàndà munda mwàbò amu, cyùdì Wèwè mukòkèlekù ntèmà yàbò, cyanaàna bàvwa mwà kwikala bayè. Kabàvwa mwà kwanyisha bwà kwimana mwaba awu mùshindù awu to.

¹⁰⁷ Mukalenge Nzambì, bwalu mbamanyè nè bòbò bàdì ànu bantu bèètù aba. Nè tudi babalè mu cibèjibeji mùvwà umwe wa ku balombodi bèètù bàà cimenga bàà kuneemekiiibwa bàà kale munkaci mwà kutèeleja Mfùmù Cindondà wa ditùngà dyètù wàkula, è kwangaciibwayè. Mukwàbò mu dinaya dyà ndundu, dilòòlò adi, muntu mumanya bimpè, wàkaya lwà cikòsù. Nè misùùkà yàbò yìdì mwaba kampàndà dilòòlò edi. Nzambì, aci neciikalè njila wetù òngà ditùkù. Pàmwàpa kaciyi mu mùshindù wùmwèwùmwè awu to, kàdì tudi nè cyà kuya.

¹⁰⁸ Nè enzàku nè bantu bàpinganè mu bòbò nè bàfikè ku dimanya nè kwikala ànu wa mu èkèleeziyà nkààyaaku kî nCyùdì Wèwè ulòmba to. Wèwè udi muswè bwà bantu biikalè buujiiibwe nè Nyumà, balediiibwe, basongiiibwe, bwoshiibwe mu Nyumà Mwimpè, batwibwe citampì, bantu bàdì basambùke mulongo, bantu babiiikidiibwe kùdì Nzambì. Nènku tudi twitabuuja nè Wèwè neutumè ditàbuluja didì Billy Graham nè bakwàbò bààbùngì munkaci mwà kusambidila adi. PaÙdì mwà kupàtwila bantu pàà nkàyaabò, kule nè cilongelu cyàbò cyà tèòlòjì, kule nè ngenzèlù yàbò yà maalu midyenzela ayi, bantu bàdì kabàyi nè bwòwà to, bantu bàà—bàà ngiikàdìlù Webè, bàdì bàKwitabuuja nè bàKukwàcila ku Diyì Dyèbè.

¹⁰⁹ Nzambi, swâkù bwà bààbûngi bàà kùdibo biikalè biimanè mwab'ewu mpindyewu, bààfila byònsò bìdibo naabi abi kùdì Mukalenge Yesù, nè kulekela maalu ônsò à pa buloba, kupita Gilègàlà kumushiya paanyimà, mwaba wà ditonda nè bishimikidi byà bwena Kilistò. Kutùngunuka kupita nè cilongelu cyà bapròfetà bàvwà basòmbe kuntwaku nè tèdòlòjì wabò abu. Kutùngunuka nè ku Yadènè, ku cikèènà-kumòna cyà patòòke pàvwàbo mwà kusabuka, kusangana nè Nzambi udi nè mwoyi ùcidi ànu nè mwoyi.

¹¹⁰ Pashìishe tudi tusangana mupròfetà ewu munkaci mwà kukènzakana, nè ki Banjèlò bàmwèbàmwè bàà Kapyà abu, nè màkalù a mvità, mu Dotànà mwàmwa, dîngà ditùkù.

¹¹¹ Ucidi ànu mwab'ewu dilòòlò edi, Mukalenge. Biikilà bantu Bèèbè balùme, biikilà bantu Bèèbè bakàjì, songàalùme Yèbè, songààkàjì Yèbè, Mukalenge. Akùlà mēyì à ditalala ku myoyi yàbò nè enzàku bwà bàsabukè bàye dyàmwàmwà, dyàmwàmwà dyà maalu à pa buloba. Bwalu tudi tulòmba nùnkù mu Dîná dyà Yesù nè bwà bwalu Bwèndè. Amen.

¹¹² Ndi muswè kwimba aci bwà katanci kakesè cyanààna, nè ditalala dyònsò mu dikuukwila.

Enzàku diswa Dyèbè Sungasunga, Mukalenge!
 Enzàku diswa Dyèbè Sungasunga!
 Lamàku pa buumùntù bwànyì
 Bukòòkeshi bùdì kabùyì kwela mpatà!
 Mfwimbè nè ùngénzè
 Bilondèshile diswa Dyèbè,
 Pândì mwindìle apa,
 Mudilekèlèlè nè mupòlòbèlè.

Bònsò cyàpàmwè mpindyewu, mu dikuukwila.

Enzàku diswa Dyèbè Sungasunga . . .

Mpindyewu dilàmbùlaayi nwènù biinè kùdì musambu awu, ku musambu awu, kùdì Nzambi.

Enzàku diswa Dyèbè Sungasunga!
 Lamà pa buumùntù bwànyì
 Bukòòkeshi bùdì kabùyì kwela mpatà!
 Mfwimbè nè ùngénzè
 Bilondèshile diswa Dyèbè,
 Pândì mwindìle apa,
 Mudilekèlèlè nè mupòlòbèlè.

¹¹³ Bitùlùlùbitùlùlù mpindyewu, mu dikuukwila mpindyewu. Kanùkènzakanyi to, tàngilàayi ànu kùdì Nzambi.

Enzàku diswa Dyèbè Sungasunga . . .

Ucyàmbilamù bulelèlè.

Enzàku diswa Dyèbè Sungasunga!
 Wèwè udi Mufwimbi;

Mémè ndi diima.
 Mfwimbè nè ùngênzè
 Bilondèshile diswa Dyèbè,
 Pândi mwindile apa,
 Mudilekèlèlè nè mupòlòbèlè.

114 Ndi ngiitabuuja nè mbifwànyine kwikala bîmpè menemene. Nudi banangè kukuukwila anyi? Diyiisha dyàjiki mpindyewu. Twánjàayi ànu kukuukwila, katanci kakesè, nè mitù yetù miinyika, musambu awu cyàkàbìdì. Ùwàmbidila mu mwoyi wèbè amu.

Ikàlà nè Wèbè . . .
 Enzàku diswa Dyèbè Sungasunga!
 Wèwè udi Mufwimbi;
 Mémè ndi diima.
 Mfwimbè nè ùngênzè
 Bilondèshile diswa Dyèbè,
 Pândi mwindile apa,
 Mudilekèlèlè nè mupòlòbèlè.

115 Mukalenge, enzàku nànkù: Swâkù bwà muntu yònsò, kwambwila ku bânà bakesè aba too nè ku muntu mukolè ku bònsò mulùme nè mukàji bìikalè mu Bwikadi bwà Nzambì, swâkù bwà Nyumà Mwîmpè àkwatè mudimu mpindyewu mene pa diitabuuja dyàbò nè ùmushèku mpatà yònsò, mapangila ónsò makesè awu, nè swâkù bìikalè bafwimbibwe bilondèshile diswa Dyèbè. Pàcidibo mu lukàtà lunène lwà difwimbà Dyèbè apa, tudi tutèeka misùukà yetù bwà dilàmbula, difwimbibwa cyàkàbìdì. Enzàku nànkù, Éyì Nzambì, mu Dìna dyà Yesù, Mwânà Webè. Amen.

116 Ndi ànu munangè eci. Kàdi nwènù? Ànu mu cimùmà kuumvwa Nyumà Mwîmpè. Kaa, paanyimà pàà Mukenji mukàyàbàlè, nè pashìishe kalolo kàà Nyumà Mwîmpè aku! Ùdi ùlwila ku Dìyì. Nèngiikalè mwà kwimba citùminyì cyà wòwù awu, anyi kuciteeta.

Ùdi ùzònzà mashi, èyowà, ùdi ùzònzà mashi,
 Èvànjeeliyò wa Nyumà Mwîmpè ewu, ùdi
 ùzònzà mashi,
 Mashi à bayiidi bààkafwilà Bulelèlèlè abu,
 Èvànjeeliyò wa Nyumà Mwîmpè ewu ùdi
 ùzònzà mashi.

Wa kumpàlà bwà kufwà bwà ndongamu wa
 Nyumà Mwîmpè ewu,
 Ùvwa n'Yone Mubàtiiji, kàdi wàkafwà bu
 muntu;
 Pashìishe Mukalenge Yesù kulwa,
 kuMupoopelabò pa nkùrusè,
 Wàkayiisha nè Nyumà ùvwa mwà kusùngila
 bantu ku mpèkaatù.

Kùvwa Peetèlò nè Pòlò, nè Yone wa Nzambì,
 Bààkafila myoyi yàbò bwà Èvànjeeliyò ewu
 wàmòna mwà kukenka;
 Bààkasambakaja mashi àbò, mwàkenza
 bapròfetà bàà kale,
 Bwà Díyì dilelèlèlè dya Nzambì dyàmbiibwè nè
 meeji matòòke ònsò.

Pashiishe bààkaasa Stèfanò mabwe, yèyè
 wàkayiisha ùlwisha mpèkaatù,
 Kubàfiikishayè munda bikolè, bóbò
 kumuzaaza mutù;
 Kàdi yèyè wàkafwà mu Nyumà, wàkakùùla
 mwoyi,
 Nè wàkaya katwilangana nè bakwàbò abu,
 cilwilu cifi di cyà mwoyi aci.

Misùùkà yìdì mwínshì mwà cyoshelu ayi, yìdì
 yèla lubilà nè: “Too nè díbà kaayi?”
 Bwà Mukalenge kunyooka Yè bònsò bàdi benze
 bibi abu;
 Kàdi nekwikalè bakwàbò kàbìdì bààfilà mashi
 à mwoyi wàbò
 Bwà Èvànjeeliyò wa Nyumà Mwímpè ewu nè
 lukòkà Lwèndè lukünze bu mashi alu.

Bònsò cyàpàmwè mpindyewu.

Ùdi ùzònzà mashi, èyowà, ùdi ùzònzà mashi,
 Èvànjeeliyò wa Nyumà Mwímpè ewu, ùdi
 ùzònzà mashi,
 Mashi à bayiidi bààkafwilà Bulelèlèlè abu,
 Èvànjeeliyò wa Nyumà Mwímpè ewu ùdi
 ùzònzà mashi.

¹¹⁷ Bávwa cinyi? Bantu bávwa Nzambì mulongèshe nè
 mubiikile. [Katùpà kàà mukàbà wà mèyì munda mutupù—Muf.]
 Mmunyi mùdiku Nzambì mwà kukwàta mudimu nè muntu
 mutulùmùke bwà kubweja Díyì Dyèndè mu cyalu? S'ùdi nè
 bwòwà. Ke bwà cinyi kabèèna bamanyè kantu nànsha kàmwè
 pa Cyòci aci to. Bantu bàdi kabàyi nè bwòwà to, bàdi Nzambì
 mutengùle ku Nyumà Mwímpè abu, Nzambì ùdi nè mwoyi
 munda mwàbò amu. Yèyè's mmufwànyine ànu kutwà mashi
 èndè citampì, bujaadiki bwèndè nè mashi èndè; kī mbwalu to.
 N'Kilistò udi nè mwoyi awu. “Bwànyì mèmè kwikala nè mwoyi
 n'Kilistò, nè kufwà ndifutu.” Ke mùshindù awu wùvwàbò
 bàdyùmvwa bwà bwalu abu. Amen.

¹¹⁸ Mpindyewu díbà dyákànyì bwà mulongo wà babèèdi. Nè
 mmulongo wà babèèdi wà ùbanga kumpàlà kwà díbà, tudì ànu
 bu tusunsa makùmi àbìdì paanyimà pàà díbà mwandamukùlù.
 Kàdi tudì baswè kusambidila bantu. Nènku ndi muswè bwà
 nwènù mpindyewu, eci...Diyiisha dyònsò ditùdì bafwànyine

kwenza kadyèna mwà—kadyèna mwà kufwànyikijiibwa nè Dîyi òmwèpèlè dyakula dyà kùdì Nzambì Yèyè mwìnè to.

¹¹⁹ Mpindyewu bwà kubanga mulongo wà babèèdi, bu mùdibi nè, tudi balayè bwà kusambidila bònso. Citwikalà mwà kwenza, bu Nzambì mwà kwanyisha. Twètù, dilòòlò dyònsò, tudi twabanya twartà twà disambila. Nè twamba, mu cyòci eci, nè . . . Dilòòlò dyònsò tudi bafwànyine kubiikila kasumbù kampàndà munkaci amu, bwà dijingulula. Kadi bantu, dîbà adi, bàmwè bàà kùdîbo bàvwa bafwànyine kuumuka dilòòlò adi. Tuvwa bafwànyine kwenza disangisha dinène, nè Nyumà mmufwànyine kwicikila, nè bantu bafwànyine kuumuka. Nè dilòòlò dyàlondà tudi bafwànyine kwabanya tukwàbò.

¹²⁰ Nènku mèmè nciyi mutùpàkàne to, ùndi mutàngile ewu kî m’Fannie Wilson udi mwimàne paanyimà pàapa wàwa anyi? [Mwanètù wa bakàjì Wilson ùdi wàmba nè: “Ncyà bushùwà.”—Muf.] Ndi mvùluka mungààkangata mukàjì awu, kùkaadi bu dikùmi nè mwandamutekète . . . Kaa, bipite nè apu, bitwè ku makùmi àbidi nè . . . [“1932.”] 1932, ùpunga nè lufù, nè disaamà dyà cyàdi, nè ngàngàbukà wa mu cimenga eci ùvwa mumwele làà. Nènku yèyè ùvwa mulùke mashi mu mùshindù wà nè mbulankètà nè bintu byònsò bìvwàye mulàadile bivwa bibolè nè mashi. Bàyendè nè mwanèndè wa bakàjì kulwàbò kungangata, dindà kampàndà. Mèmè kuya kuntwaku nè kusòka pambidi pèndè, Dìnà dyà Mukalenge Yesù. Nènku paanyimà pàà ndambù wa matùkù, mu mashikà makolè à muvù wà mashika, mèmè kumubàtiiza mu Dìnà dyà Mukalenge Yesù, ku musùlù. Ke kwikilayè mu njila, paanyimà pàà màshinyi à kale à ngombe, mubolè nè mwèndè mwònsò. Nyèyè ewu ùcidi ànu nè mwoyi dilòòlò edi, bwalu Kilistò wàkacyènzà. Musangu wà kumpalà wà kumumòna mu bidimu byàbùngi. Nkènzakana mu batèèleji amu, è kumumòna.

¹²¹ Nzambì ùcidi ànu nè mwoyi. Ncyà bushùwà. Nè Yèyè wàkamba nè: “Bwalu Mèmè ndi nè mwoyi, nwènù pèènù nudi mwà kwikala nè mwoyi.”

¹²² Mpindyewu mvwà kujinga bwà, kwenza ànu bu kunujaadikila cidi eci nùnkù ciikàle, bwalu, mèmè nciyi mwenze nànkù to, dîbà adi nudi bafwànyine kuya kwamba nè: “Èè, ncyèna ngumvwa aci to.”

¹²³ Mpindyewu, cyànyi cindì ntwà nyama ku mikòlò cidi nùnkù ewu, nè: “Yesù Kilistò ùdi ùshààla umweumwe awu makèèlèlè, leelù, too nè kashidi.” Mpindyewu, piikalàbi nè Yèyè ùdi umweumwe awu, bìkèngela Yèyè ikalè umweumwe mu dîyi dikùlù dyònsò, umweumwe mu—mu bukolè, umweumwe mu ngulu, umweumwe mu byònsò bìvwàYe abi.

¹²⁴ Nènku pàvwà pa buloba apa, kùvwaku beena Ngelikà kampàndà, musangu kampàndà, bààkalwà nè kwamba nè: “Bakalenge, tudi baswè kumòna Yesù.”

¹²⁵ Nènku ndi ngèèla meeji nè ke dijinga dyà mulùme yònsò anyì mukàjì yònsò ukààdikù mumvwè bààkula bwà Yesù awu, mmuswè kuMumòna. Nènku Yèyè kàyi umweumwe awu to, dībà adi katwèna mwà kuMumòna to. Kàdi Yèyè mwikàle umweumwe awu, tudi mwà kuMumòna, cyanààna Yèyè mmwambè cintu cyà mafi. “Mu katanci kakesè, bàà pa buloba kabààkuMmòna kàbìdì to, kàdi nwènù nenùMmònè, bwalu Mèmè,” mupinganyi muleeji muntu, “Nèngìikalè neenù, munda mwènù mene too nè ku ndekeelu kwà cikondo.” Nè pashìishe Yesù mmulayè bwà kwikala mu Èkèleeziyà Wendè, wènzà bintu bìmwbìmwè byàkenzàYe musangu awu abi, too nè ku cikondo cyà nshìikidilu. Mpindyewu, Yèyè wàkamba nè: “Katanci kakesè,” bàà pa buloba kabààkuMumònakù kàbìdì to. Èè, dībà adi, mmunyi mutùdì bafwànyine kuMumòna? Bìvwa bìkèngela bwà twètù kumòna Nyumà Wendè, pìikalàYe munda mwètù, nè bìvwa bìkèngela bwà Nyumà awu kwenzayè cintu cìmwècìmwè cyàkenzàYe musangu awu aci, bwà cyanààna Kì mmufwànyine kwikala Nyumà umweumwe awu to.

¹²⁶ “Mèmè ndi Mwonji wà mvinyò, nwènù nudi matàmbà.” Nènku twètù bakwamè...Ditàmbà dyòdì mu Mwonji wà mvinyò, ditàmbà nedìkwamè bimuma byà mùshindù wùdì Mwonji wà mvinyò wùkwàma. Èè, Mwonji wà mvinyò wà kumpàlà wàkapatuka...Ditàmbà dyà kumpàlà dyàkapatukà mu Mwonji wà mvinyò adi divwa ditàmbà dyà mpenta; bìkèèna-kumòna, makolè, dyondopa, dibàtiiza dyà Nyumà Mwìmpè, bimanyinu binène nè maalù à kukèma. Ditàmbà dyàlondà nedìikale ditàmbà dyà mùshindù wùmweùmwe awu. Ànu nànkù too nè ku ndekeelu, nebìikalè nè cyà kwikala cintu cìmwècìmwè aci. Ke cyàkamba Yesù.

¹²⁷ Mpindyewu, tùmònaàiyibì cyàkadìYe makèèlèlè. Bu twètù mwà kujandula cyàkadìYe makèèlèlè...Mpindyewu, ndi ngàngata njila wà cikòsò, bwà dībà's; nèngìikalè nè cyà kufila tusunsa tutwè ku tùtaanu twà dileeja dyà njila. Nènku bu twètù mwà kumòna cìvwàYe makèèlèlè, dībà adi's tudi mwà kumòna cìdìYe leelù ewu, nè cìikalàYe bwà kashidi. Aci ncilenga cikùmbàne anyì?

¹²⁸ Mpindyewu, pààkadìYe pa buloba apa, Wàkalwa bu Maasiyà, kubàtiijibwa kùdì Yone Mubàtiiji; kàvwakù mwànji kwenza byenzedi to. Nè Yèyè wàkabwela mu mudimu Wèndè wà bwambi wà ku cibangidilu awu. Mbanganyì bàvwàYe mutùmìibwe kùdìbo? Beena Yudà.

¹²⁹ Mpindyewu, tudi bamanyè nè kùdì bisàmbà ànu bisàtù byà bantu pa buloba, mbwena kwanba nè: beena Yudà, bàà Bisàmbà byà bendè, nè beena Sàmaalèyà; cìdì cìikale beena Ham, beena Sem, nè beena Yafètè. Beena Yudà, bàà Bisàmbà byà bendè, nè beena Sàmaalèyà.

¹³⁰ Nudi bavùlùke anyì? Peetèlò wàkabàbìikila, nè nsapì

yà Bukalenge, mu Ditùkù dyà Mpenta, kùdì beena Yudà. “Nyingàlalaayi, muntu nè muntu wa kunùdì, nè nùbatijiibwè mu Dìnà dyà Yesù Kilistò.”

¹³¹ Filipò wàkapweka è kuyiishayè beena Sàmaalèyà. Bònsò bààkiitabuuja nè bààkanyingalala, nè bààkabàtijiibwa mu Dìnà dyà Yesù Kilistò. Cìkòlà, Nyumà Mwímpè kàvwa mulwè pambidi pààbò to. Peetèlò nguvwa nè nsapì ayì. Wàkapweka nè kubàtentekela byanza, è kupetabò Nyumà Mwímpè.

¹³² Nè pashiishe Kòneeliyò, wa Bisàmbà byà bendè, kupetayè cìkèenà-kumòna, nè uvwa nè cyà kubiikidisha muntu uvwa ubiikidiibwa nè Peetèlò, Simonà Peetèlò, uvwa musòmbèle mu nzùbù mwà muntu kampàndà uvwa mukoonyi wa bisèba. Nènku pàakafikà Peetèlò kuntwaku nè: “Pàcivwà ànu Peetèlò wàkula Méyì aa, Nyumà Mwímpè kubàpwekelaYè.” Pashiishe ke Peetèlò kwambayè nè: “Muntu ùdikù mwà kukàndika màyì anyì? Aba mbapetè Nyumà Mwímpè mutwàkapetà twètù ku cibangidilu amu.” Ditàmbà dyònsò didi dipàtuka ànu mùshindù wùmwèwùmwè awu. Nwamònu anyì?

¹³³ Mpindyewu, pàakatwilanganà Yesù...Mpindyewu, Yèyè kààkalwa kùdì bàà Bisàmbà byà bendè to. Mbanganyì bàdì bamanyè nànkù? Yèyè wàkakàndika bayiidi Bèndè bwà kuyabò kùdì muntu kanà yònsò wa bàà Bisàmbà byà bendè. Mbanganyì bàdì bamanyè nànkù? “Kanùyì mu njila wa bàà Bisàmbà byà bendè to, kàdì ndàayi ànu kùdì mìkòòkò mijimìne yà Izàlèlèlà. Nènku panùdì nuya apu, nùyiishè, nwamba nè: ‘Bukalenge bwà mu Dyulu bùkaadi pabwìpì,’ kùdì mìkòòkò mijimìne yà Izàlèlèlà.”

¹³⁴ Mpindyewu, mbanganyì bàvwà bindile bwà Yèyè kulwa mu ditùkù adi abu? Kì mbàà Bisàmbà byà bendè to; twètù tuvwa bampàngaanù, ba-Anglo-Saxons. Tuvwa beena Loomò, tukuukwila dībā nè bikwàbò. Katùvwa bindile Maasiyà nànsha umwe to, kàdì beena Yudà nè beena Sàmaalèyà ke bàvwà bindile. Mpindyewu, Yèyè wàkaDimanyisha bishi kùdì bantu bàvwà bàMukèba abu?

¹³⁵ Twàlukilàayi mpindyewu ku Yone Munsantu, nshapità 1, nè ànu bwà katanci kakesè cyanàànà mpindyewu. Nènku tèelejàayi nè ntèmà.

¹³⁶ Mwena Yudà wakumpàlà wàkatwàdiibwa kùdìYe, pàvwà Filipò anyì...Andèlè kukùdimuna mucìma, kàdì kuya kasangana mwanààbò, Simonà Peetèlò, wàkatwàla Simonà kumpàlà kwà Yesù. Ke Yesù kumwambila cìvwà dìnà dyèndè, nè cìvwà tatwèndè. Mbanganyì bàdì bamanyè nànkù? Nudi nwela meeji nè ncinyi cìvwàci cyenzèle muntu awu, uvwa mwà kupeta pashiishe nsapì yà Bukalenge mu cyanza cyèndè? Ke cyàkashindikàYè Yèyè mwìnè nè ke cìvwàYe, Maasiyà.

¹³⁷ Lùkàsàlùkàsà, dībā adi, Filipò kukùdimunayè mucimà, è kuya kasangana Natànaèlà. Aci’s cidi mu ntàntà wa kilòmèètà

makùmi ànaayi nè mwandamukùlù mu nyùngulukilu wa mukùnà amu. Ke kulwaye kwèndè kumbèlu, nè ndi mwà kumuumvwa wàmba nè: “Kaa, Mandamu Natànaèlà, Natànaèlà ùdi penyì?”

“Kaa, ùdi ùsanganyiibwa pambèlu mu—mu budimi bwà mici yà olèvà.”

¹³⁸ Kuyayè lubilu lukolè mwaba awu: “Natànaèlà, udi penyì?” È kumusanganayè mwînshì mwà mucì kampàndà. Nè Natànaèlà ùvwa ùsambila. Ke kwindilayè too nè pààkajikijàye kusambila. Ke yèyè nè, kabìyi nè: “Wetwàwu, Natànaèlà. Byà pa madimi bìdi byènda bìshi?” to. Kaa, yèyè’s ùvwa nè mukenji! Mùshindù awu ke wùdì naawù muntu udi mutwilàngàne nè Yesù. Kèna nè dîbà bwà lukutukutu to. Yèyè nè: “Lwâkù, ùmone Utùdì bapetè, Yesù wa mu Nazàlèetà, mwànà wa Yözefù!”

¹³⁹ Nènku mpindyewu ndi mwà kumòna Natànaèlà munkaci mwà kutuutula lupwishi ku bilàmbà byèndè, ùmukila ku disambila. Yèyè nè: “Mpindyewu, Filipò, ndi mumanyè nè wèwè udi muntu mwîmpè, nè muntu wa meeji matòòke. Mpindyewu, nkufwànyinekù kupàtuka cintu cîmpè mu Nazàlèetà anyi? Èè, udi mumanyè’s, bu Maasiyà mwà kulwa, Ùvwa mwà kulwila ku Yèlusàlèmà, ku èkèleeziyà.” Ke cidi bantu bèèla meeji leelù ewu ncyôci aci. Nwamònu anyi? “Ùvwa mwà kulwila ku Yèlusàlèmà. Kaayifà kààkacimanyishakù ku disangisha dyà ndekeelu to. Pa nànkù, nànsha umwe wa ku beena tèòlôjì kààkacimanyishakù to. Pa nànkù ntu mumanyè nè wèwè udi muntu wa meeji matòòke. Udi mulalùke ne dikolesha dyà maalu kampàndà anyi?”

“Kaa, to. Lwâ ùjandulè.”

Yèyè nè: “Cintu cyà cîmpè cìdikù mwà . . .”

¹⁴⁰ Kumupèèshayè dyandamuna ditàmbe bwîmpè divwà muntu kanà yònsò ewu mufwànyine kufila, kwambayè nè: “Lwâ, ùdimwènè.”

¹⁴¹ Mpindyewu, lwà mu njila amu, ndi mwà kuumvwa Natànaèlà wàmba nè . . . anyi Filipò wàmbara Natànaèlà nè: “Udi mumanyè mùdì bwalu anyi? Udi muvùlùke mulòbi wa kale uvwa kuntu kwàka uvwa kàyì nànsha mwà kufùnda reçu awu anyi paùvwà mumupèèshe, pawàkamusùmba mishipa apu anyi?”

“Èyowà. Ndi ngèèla meeji nè dîna dyèndè ùvwa n’Simonà.”

“Èyowà’s, ki yèyè awu.”

¹⁴² “Mvwa mulwè nendè, ditùkù adi, kumpàlà kwà Maasiyà awu, nènku Yèyè mmwenzè ànu ùmumòna, Yèyè nè: ‘Dîna dyèbè n’Simonà. Dîna dyà tatwèbè n’Yona.’ Nènku ndi . . . Kî mbifwànyine kunkèmesha to, bwà nè paùdì ulwa kumpàlà Kwèndè, Yèyè kààkupanga kukwambila nè wèwè uvwa nganyi to.”

Yèyè nè: “Aa, mpindyewu, anji indilà kakesè, bwànyì mèmè to.”

143 Pa nànkù, ditùkù dyàkalondà kufikabò. Nènku Yesù ùvwa mu mulongo wà babèèdi, bu pa ciibidilu, munkaci mwà kusambidila babèèdi, nè piinè apu mpàvwàYe, mwà kwikala mulwè mubwèlè mu batèèleji amu, Yesù kubàndulula mèsù, è kumònaYè Filipò ùlwa, wènda ùtwàla muntu mu kajila amu. Ke kumutàngilaYè, nè kwambaYè nè: “Mònaayi mwena Izàlèèlà mwena munda mùdi kamùyi budimù nànsha.”

144 Aci’s n’Dilongesha dyà pabwàdi anyi? Aci’s cìvwa n’Yesù, makèèlèlà awu. Aci’s n’Yesù, leelù ewu, pìikalàYe umweumwe awu.

145 Ke muntu awu kwimanayè. Ndi mwà kumòna Natànàèlà, uh, Fìlipò ùmuzànjika, wàmba nè: “Mvwa mukwambile cinyi? Mvwa mukwambile cinyi?”

146 Yèyè nè: “Laabi,” mbwena kwamba nè *mulongeshi*, anyi cyònsò citùdi bafwànyine kuciinyika leelù ewu aci, nudi bamanyè’s. Mu bulelèlà, mwàkù mulelèlà wà cyena Ebèlù, ùdi ùmvwija nè *mulongeshi*. Yèyè nè: “Laabi, Wèwè ukààdikù mummòne dībà kaayi? Mmuniyì mÙdi mumanyè cintu kampàndà pa bidì bintàngila? Ncìtukù mwanji kuKumòna to kacya bàndela. Wàmanyi muniyì nè mèmè ndi mwena Izàlèèlà? Wàmanyi muniyì nè ndi mwakàne, nè wa meeji matòòke, nè mwambi wa bulelèlà? Kacya Kùtukù mwanji kummòna to, kacya bààKulela. Udi mummanyè muniyì?”

147 Yèyè nè: “Kumpàlà kwà Filipò kukubiikilayè, paùvwà mwînshì mwà mucì apu, Mèmè mvwa mukumòne,” kilòmèètà makùmi ànaayi nè mwandamukùlù mu nyùngulukilu wa mukùnà amu, ditùkù dīvwa didyànjlile. Mèsù kaayi’s wè!

148 Mpindyewu cyàkambàye ncinyi? Wàkamba nè: “Laabi, Wèwè udi Mwànà wa Nzambi. Udi Mfùmù wa Izàlèèlà.” Beena Yudà bóbò bajingùlùle aci. . . Mpindyewu anji indilaayi. Abu’s bàvwa mbeena Yudà basungula. Mbanganyi bàdi bìitabuujà disungula? Kaa, kùdi bantu bààbùngi bìikalà kabàyi mwà kucyàkidila to. Nwamònu anyi? Bible ngudi mwámbe nànkù. Kàdi muntu awu ùvwa nè Nyumà wa Nzambi munda mwèndè. Ke yèyè kucijikulaye, wàmba nè: “Laabi, Wèwè udi Mwànà wa Nzambi. Udi Mfùmù wa Izàlèèlà.”

149 Kàdi’s ke beena tèòlòji bàà mu ditùkù adi abu biimàne, baakwidi nè balongeshi banène, bàMutèèleja. Kàdi nudi bamanyè cyàkambàbo anyi? Bààkamba nè: “Yèyè mmwena lubuku. Ùdi nè nyumà wa Beelèzèbùlà pambidi Pèndè.” Yesù. . . Kabààkacyàmbakù, nè dīyì dikolè to. To, to.

150 Kàdi Yesù kukùdimuka è kubàtàngila. KwambaYè nè: “Nudi mwà kuMbiikila nànkù kàdi kubènga kunyookiibwa bwà bwalu abu. Kàdi nekùlwe cikondo cyàlwà Nyumà Mwimpè, nè paùdi wamba dīyì dibi Bwèndè pàdiYe wenza cintu cimwècimwè aci,

kacyàkufwidiibwakù luse to ní mmu eci cikondo ní mmu cikondo cìcilwalwà.”

¹⁵¹ Pa nàнку díbà adi citùdì tukwàta naacì mudimu ncinyì? Abu bàvwa mbeena Yudà. Beena Yudà bàà cyà bushùwà balelèlè nè bàà meeji matòòke bàvwa baMwitàbùùje nè m’Maasiyà awu.

¹⁵² Balongeshi nè beena tèòlòjì, bàvwa cinyì? Dimiinu dyà nyòka, mutùdì baciyiile emu. Yèyè nè: “Nwènù nudi bàà tatwènù, dyabùlù.” Nànsha nàнку, bàvwa nè meeji matwè, bàà meeji àbùngì, bantu bàà cijila. Kabàvwa mwà kunyungisha cituuta to... Bàà cijila. Kabàvwa mwà kunyangakaja Nsabatu to. Kabàvwa mwà kudyà minyìinyi to. Bàvwa bantu bàà cijila, kàdi bààkapanga kumòna. Nwamònu’s, bàvwa balongeshiibwe kùdì muntu.

Nzambì ùtu ùlongesha bantu Bèndè, bakàyàbàle. Ncyà bushùwà. Bantu babiilkila kùdì Nzambì’s!

¹⁵³ Pashiishe dīngà ditùkù Ûvwa—Ûvwa mufwànyine... Ke cìvwà beena Yudà bèèla meeji ncyòci aci. Ke mùshindù wàkaDimanyishàYe kùdì beena Yudà awu. Mbanganyi bàdì bamanyè nè aci m’Mufùndu? Èyo. Mpindyewu, pìikalàYe muDimanyishe kùdì beena Yudà, ùvwa n’Yèsù makèèlèlè awu nè beena Yudà.

¹⁵⁴ “Mpindyewu, wèwè’s wǎmbì nè: ‘Beena Sàmaalèyà bàvwa baMwindile bwà kulwa.’” Èyowà, bàvwa baMwindile, kàdi kī mbàà Bisàmbà byà bendè to. Ànu beena Sàmaalèyà nkààyaabò.

¹⁵⁵ Nènku pààkatwilanganàYe dyàmbedi nè beena Sàmaalèyà, bìvwa bikèngela bwà kupìcilaYè mu Sàmaalèyà. Ke kwimanaYè, nè kutùma bayiidi Bèndè bwà kuyabò, bwà kakeba cyàkudyà, lwà pa díbà dikùmi nè ibìdì jaajaaja. Wàkasòmba pa ciinà cyà mâyi. Kupàtukakù mukàjì kampàndà, wàkabanga... Mpindyewu, tudi bamumanyè, mu ditùnga emu, bwà nè mmukàjì wa luumù lubì, ndalambu wa mu mùsèèsù, nudi bamanyè’s, ndumbà. Ke kupàtukayè nè kubangayè kupwekesha mbekeci mu ciinà, bwà kusunakù ndambù wa mâyi. Ke kuumvwayè Dìyì dyàmbe nè: “Mukàjì, Ntwàdìlèku mâyi à kunwà.” Kukènzakanayè kàdi ke mwena Yudà mùshindàme ewu musòmbè mwaba awu.

¹⁵⁶ Yèyè ùvwa ànu nè bidimu makùmi àsàtù nè byà mu njila, kàdi Bible mmwambè nè Yèyè ùvwa nè mmwènekèlu wa bidimu makùmi àtaanu. Bòbò nè: “Kwèna Muntu wa bidimu bipite pa makùmi àtaanu to, kàdi wamba m’Ùdì ‘mumòne Abraham?’”

¹⁵⁷ Yèyè nè: “Kumpàlà kwà Abraham kwikalayèku, Ndì.” Nwamònu anyi? Ûvwa nè cyà kwikala ùmwèka bu muntu mununu bwà mudimu Wèndè, mubidi Wèndè wà buntu awu.

¹⁵⁸ Ke kukènzakanayè. Kumanyayè nè Yèyè ùvwa mwena Yudà. Yèyè nè: “Mukalenge, kacitu cilelè bwà nwènù beena Yudà

kulòmba beena Sàmaalèyà bintu bu nànkù awu to. Katùtu tupetangana neenù to.”

¹⁵⁹ Yèyè nè: “Mukàjì, bu wêwè nànsha mumanyè nè mwinè ûdì wakula nendè ewu Nganyì, nùnkù wêwè's nguvwa mwà kundòmba Mémè mâyi à kunwà. Nè Mémè mvwa mwà kukutwàdila, kukupèesha wêwè mâyi àudì kùyì ulwa apa bwà kusuna to.” CìvwàYe wènza aci ncinyi? Ùlenga nyumà wendè. Nwamònu anyi? Tàngilàayi, Yèyè neàDileejè kùdì beena Sàmaalèyà, mpindyewu.

¹⁶⁰ Ke yèyè nè: “Mòna's, wêwè udi wamba nè: ‘Kuukwilaayi ku Yelusàlèma.’ Twètù tudi twamba nè ‘Ku mukùnà ewu.’”

¹⁶¹ Yèyè kwamba nè: “Cikondo cìlwalwa, nè cidikù mpindyewu, cinwìkalà kanùyì mwà kukuukwila Nzambì, ní mpa mukùnà ewu anyi mu Yelusàlèma to, kàdì mu Nyumà nè mu Bulelèlè. Taatù ùdì ùkèba bàà nànkù awu abu.”

¹⁶² CìvwàYe munkaci mwà kwenza aci ncinyi? Munkaci mwà kubàkula nyumà wendè. Ke paanyimà pàà katanci, pààkajandulàYe mwaba wùvwà lutàtù lwèndè... Mbanganyì bàdì bamanyè cìvwà lutàtù lwèndè? Ùkaavwa nè balùme bàtaanu, nè ùvwà musòmbe nè mwisambòmbò. Pa nànkù, Yèyè kwamba nè: “Mukàjì, ndààku ùkangàtè bàyeebè kàdì ùlwe mwab'ewu.”

Yèyè nè: “Ncìtu nè bàyaanyi bwàlà.”

¹⁶³ Yèyè nè: “Ncyà bushùwà. Uvwà nè... ùvwà nè bàtaanu, nè ewu ùdì musòmbe nendè mpindyewu awu kì ngwebè to.”

¹⁶⁴ Kwimanayè nè kuMutàngila. Mpindyewu, yèyè kààkambakù nè: “Wêwè udi Beelèzèbùlà, mukalenge. Wêwè udi mwena lubùkù” to. Ùvwà mumanyè byàbùngì pa bwalu bwà Nzambì kutàmba cyàbibidì cyà bayiishi bàà mu Jeffersonville, ncyà bushùwà, wa bwalu mwikàle ndumbà. Yèyè nè: “Mukalenge, ndi njingulula nè Wêwè ewu udi Mupròfetà.”

¹⁶⁵ Tàngilàayi, “mupròfetà.” Nènkù bu nwènu mwà kwaluja mwàkù awu cyànyimà, nenùwùpetè, Mupròfetà uvwa Mòsà mwambè nè neàlwe awu, nwamònu's, “Mukalenge, Nzambì wenù, neàjuule Mupròfetà mufwànàngàne naanyi.”

¹⁶⁶ Yèyè nè: “Ndi njingulula nè Wêwè ewu udi Mupròfetà.” Ùvwà mumanyè nè Yèyè kàvwa mumanyè aci mùshindù mukwàbò nànsha wùmwè to; kàvwa mwà kucimanya to. Kwambayè nè: “Ndi njingulula nè Wêwè ewu udi Mupròfetà.” Mpindyewu tèelejàayi apa nè: “Tudi...” beena Sàmaalèyà, mpindyewu, kì mbeena Yudà to, Beena Sàmaalèyà nè: “Tudi bamanyè nè, pààlwà Maasiyà, Yèyè ngwatwàmbila maalù aa.” Nudi numòna nè ncimanyinu cyà mùshindù kaayi cìvwàbò bindile's? Cimanyinu cyà Maasiyà. “Pààlwà Maasiyà, Yèyè ke watwàmbila maalù aa, kàdì Wêwè udi nganyi?”

Yèyè nè: “Mémè ke Yèyè awu, udi wakula neebè ewu.”

167 Ke kulekelelayè mulòndò wèndè wà mâyi awu, nè kubwelayè lùbilu mu cimenga, nè kwambayè nè: “Lwâyi, kanùmonàayi Muntu Udi mungambile bintu bìndi mwenzè. Kí m’Maasiyà awu anyi?”

168 Piikalàbi nè aci cívwa ncimanyinu cyà Maasiyà díbà adi, cìdi nè cyà kwikala cimanyinu cyà Maasiyà leelù ewu. Piikalàbi nè Yèyè ùdi. . . Mpindyewu, vùlukàayi, kakùtukù musangu nànsha wùmwè wùtù cishimà aci cyenjìlbwe kumpàlà kwà muntu wa bàà bisàmbà byà Bendè to. Cívwa cikàndikìlbwe. Bwà cinyi? Bàà Bisàmbà byà bendè bàvwa nè bidimu binunu bìbìdi byà dilonga dyà èkèleeziyà.

169 Kàdi mpindyewu ndekeelu wa cipungu cyà bàà Bisàmbà byà bendè nyèyè ewu’s. Nè Russie, ba-communistes, bàdi nè bómbe butàngija kunùdi aku, bwà kucìjikija, pààci. Kanùtácishi meeji to, cìdi cilwa. Bible ngudi mwambè nàku. Nebwikalè apa nè dína dyèbè difùndapù, nè nedìshaalè lupwishi mu katùpà kàmwè kàà kasunsa, ditùnga dijimà. Nediikalè dibùtùdiibwe butubutu. Mònaayi nè, ke Nzambì udi wenza aci awu’s. Ndi mumanyè nè bàdi mfùmù mudikadile, mmusumbà wa bampàngaanù. Kàdi Nzambì kààkajuulakù matùnga à bampàngaanù bwà kulongolola Izàlèlèlà mu matùkù à kale anyi? Bible ùdi wamba nè Russie nè communisme bàdi munkaci mwà kukwàta mudimu mu byanza byà Nzambì, bwà kuumusha ànu menemene bantu pa buloba.

170 Kàdi kumpàlà kwà aci kwenzekaci, Dyambwibwa didi dílwa nè dyàngata Èkèleeziyà diya nendè Kumbèlu kumpàlà kwà cyòci aci kwenzekaci. Nènku piikalà aci pabwìpì nàku, Dyambwibwa didi pabwìpì bìshi’s? Pabwìpì kutàmba aci. Pa nàku nudi numòna bwà cinyi tudi. . .bwà cinyi ndi nyiisha mùshindù wùndi nyiisha ewu, bwà cinyi ndi ndwangana nè mwànyì mwònsò; bwà cinyi Nzambì ke cyònsò cìdiYè mwà kwenza, bwà kubweja cyòci aci mu Basungula, bwà kupàtula Dimiinu dyà mukàji adi, bwà dimiinu dyà nyòka dyàmòna mwà kupeta dinyooka. Ncyà bushùwà menemene. Ke cyàkalayàYe bwà kwenza ncyòci aci.

171 Mpindyewu, piikalàbi nè Yesù wàkaDileeja patòoke kumpàlà kwà beena Yudà nè kumpàlà kwà beena Sàmaalèyà, ku bimanyinu abi, kàdi mutùlekèlè tuya kàyi útùleeja patòoke cimanyinu cìmwècìmwè aci to, Yèyè mmwena kànsungàsungà, Yèyè ànu mutùlekèlè ànu tupita, mu kwamba nè: “Tudi ba-Méthodistes; tudi ba-Baptistes; tudi beena Kàtòlikè; tudi ba-Presbytériens,” to, mukalenge, bu Yèyè mutùlekèlè tuplicila ku tèlòlòjì wa mashika.

172 Bikèngela Yèyè àlwe nè bimanyinu, maalu à kukèma, ànu mwàkenzàYe ku cibangidilu amu, piikalàYe umweumwe awu makèlèlèlè, leelù, too nè kashidi. Twáfikì mu ditùkù adi. Tukààdikù mpindyewu. Ku Bible, ku bujaadiki, ku Nyumà, ku

maalu à mamanya, byònsò bìdi bijaadika nè cidi kaaba aka. Kaa, ndi... Kaa, mvwa njinga bwà ngikalakù nè dikàndà dyà kucisàka munda mwà bantu, bwà kubàlekela bààcimòna.

¹⁷³ Nwênù bantu bàà mu Jeffersonville emu aba nudi bààkwètù. Ndi mukolèshìibwe neenù pàmwè. Nè ndi—ndi munùnangè. Kanwikadi—kanwikadi nwadyàmbidila nè ndi mukoleshi wa maalu to. Nudi nwela meeji ke mùdì maalu madyanjila kwamba aa anyi? Vulukàayi dipaasalala dyà màyi dyà mu cidimu cyà 37, nwênù aba, panwàkasekà ànu mwaba ewu mu èkèleeziyà emu. Ke mèmè kwamba nè: “Kùvwa mwà kwikala mètres àsambòmbò nè citùpà à màyi kumutù kwà mwèsèsù wà Spring Street aku,” ngondo yisambòmbò kumpàlà kwà kwenzekaci. Ngambilaayikù musangu nànsha wùmwe wùkaadiku cintu kampàndà cyambiibwe, cyà EMU MMÙDÌ MUKALENGE WÀMBA, cìvwa kaciyi ànu Bulelèlà menemene to. Ngambilaayikù cintu cimwèpelè cikaadiYekù mwambè. Kacya kacitukù to! M'Bulelèlà, nè Cìcidi ànu Bulelèlà, nè neCìikalè misangu yònsò ànu Bulelèlà.

¹⁷⁴ Mpindyewu katwèna mwà kutwàla... Ngèèla meeji nè kùdi bantu lukàmà anyi bapite apu mwab'ewu bàà kusambidila. Katwèna mwà kubàtwàla bònsò musangu wùmwe to. Netùtwalè batwikalè mwà kutwàla abu, musangu ùmwèpelè, nè pashiishe kutùngunuka nè dibàtwàla too nè patwàbàpetà bònsò mwab'ewu. Mpindyewu nèmbangilè mu... Ngèèla meeji... Billy Paul kàvwa mwab'ewu anyi? Ùdi lwà paanyimà pàapa anyi? Mwambilaayi àpàtukè mwab'ewu. Ndi muswè bwà kumòna cidi bwalu, yèyè ní mmwabànye... Ùdi mwabànye twartà twà disambila kaayi? [Mwanèètù Billy Paul ùdi wamba nè: “kàà Q, ùmwè too nè ku lukàmà.”—Muf.] Twà Q, Q, Q. Twartà twà disambila twà Q. Tàngilà pa kartà kèèbè kàà disambila apu. Kàdi nè dileetà dyà Q. Ùmwè too nè ku lukàmà. Èyo. Katwèna mwà kubàtwàla bònsò musangu wùmwe to, kadi tudi mwà kutwàla ànu ndambù ku musangu, too nè patwikalà mwà kubàfikisha bònsò mwab'ewu. Tudi baswè bwà bàlwe, ku umwe ku umwe, too nè pùikalàbo mwà kubàsambidila bònsò.

¹⁷⁵ Mpindyewu tàngilàayi. Ndi muswè bwà bantu bònsò, bàdi munda nè bàdi pambèlu, kwelabò meeji ku bwalu ebu. Nènkù bwà kujikija disangisha edi, ndi mfilà èkèleeziyà ewu kùdi mpaasàtà, Mwanèètù Neville, nnùfila kùdiye, nè yèyè kùdi Nzambi. Mwanèètù Neville ewu. Mèmè nènñùbìikilè nwènù bònsò bwà kwalukila. Mwanèètù Neville mmusàlaayi wa bukitù. Yèyè's mmusadidi mulelèlà wa Kilistò. Muiyishi wa kale wa ba-Méthodistes, ngèèla meeji, mulongi wa ku Asbury, nè yèyè mmulongèshìibwe mu beena tèòlòji bònsò, sèminèrè wa cyena tèòlòjì, nè dilabula dyà cìdìbo bàlongesha. Kàdi, dīngà ditùkù, kufikayè mu mwaba wàkamanyàye nè bìvwa bìmukèngela kwikalayè nè cintu kampàndà cyà cishìilàngàne, nènkù wàkasambuka mushoonyi. Yèyè ke mpaasàtà wa mwab'ewu,

muntu mûlè tètè nè Nyumà, muyiishi mulelèlà, mwena tèòlòjî wa cyà bushùwà. Nènkù ndi nnùlòmba, nwènú bantu bàà mu cimenga eci, nè mu cisùmbù cyà bantu eci, nwènú kanùyì nè èkèleeziyà to, kàdi baswè kutèeleja Èvànjeeliyò mulelèlà, lwàyi nùtèelejè Mwanèètù Neville. Yèyè mmwimànyine Cintu cìmwècìmwè cìndi ngiimanyina aci. Kakùyì mpatà to, mùsàlaayi mulelèlà wa bukitù. Twètù bònsò, kaaba aka, tudi banangè Mwanèètù Neville. Yèyè ùdi neetù kaaba aka kùkaadi ntàntà mule, nè tudi bamunangè.

¹⁷⁶ Mpindyewu bu Yesù Kilstò, ku Nyumà, mwà kwalukila kaaba aka dilòlòlò edi nè kwenza bintu bìmwbìmwbè byàkenzàYe pàvwàYe pa buloba apa abi, kùdi beena Yudà nè beena Sàmaalèyà, Yèyè neenzè cintu cìmwècìmwè aci bwènú nwènú bàà Bisàmbà byà bendè, mbanganyì bàà kunùdi bàmbà nè: “Mémè nèMmwitàbùjè nè mwoyi wànyì wònsò nè nèncitabè ànu mwab’ewu mene”? Nànsha wèwè mwikàle wa mu èkèleeziyà kaayi. Aci kacýèna nè. . .

¹⁷⁷ Wèwè udi wamba nè: “Udi muswè bwà mémè kulekela diya dyà mu èkèleeziyà wa ba-Méthodistes anyi?” To, mukalenge. “Wa ba-Baptiste anyi?” To, mukalenge.

¹⁷⁸ Udi uya mwaba wònsò wúdi muswè kuya awu, bwalu Nzambì ùdi nè bàna mu yònsò wa ku èkèleeziyà ayi. Cyà bushùwà, Yèyè ùdi naabù. Nè wèwè, pàmwàpa, udi umwe wabò. Nè mémè ndi mukunangè ànu bu nè uvwa cidimba cyà mu Branham Tabernacle amu. Kabyèna nè cìdìbi bìshintulula kùndi nànsha cìmwè to. Nudi bamanyè aci ku mudimu wànyì wà bwambi, myaba yònsò. Ndi ngiitabuuja nè Nzambì mmunangè bàna Bèndè, nànsha bàmba nè ncimanyinu kaayi cìdìbo bakwàte aci. Cyùdi mu mwoyi wèbè ke cìdì nè bwalu. Kàdi tudi ànu tukubiikila bwà kubwela mu bwobùmwè. Tudi tunùjingila difika dilenga bwà kulwa.

¹⁷⁹ Mpindyewu, muntu kanà yònsò ewu mmumanyè, nè nwènú beena mu Jeffersonville aba nudi bamanyè, paanyimà pàà bintu byònsò byàbúngì bìdì byambiibwe nè byenjiibwe, nè bidyànjila kwamba, byònsò byà kùdìbi bìdì munkaci mwà kwenzeka ànu mu byòbì menemene. . .Mbanganyì kaaba aka mu Jeffersonville bàdì bamanyè nè aci mbulelèlà? Elàayi byanza muulu, bàdì bamanyè mu nyùngulukilu emu mpindyewu abu. Mpindyewu, bwènú nwènú bàà pambèlu pàà cimenga, nudi bamòne cìndi njinga kwamba aci anyi? Mbantu búngi kaayi bàà pambèlu pàà cimenga bààkaadiku kacýa babwèlè mu masangisha àànyì nè bamòne cyòci aci cyenzèke menemene ànu mùshindù úvwàCi cyàmbè? Elàayi byanza byènú muulu, kùdi beena mu Jeffersonville. Nwamònu anyi? Bible mmwambè nè: “Mukana mwà bantèmù bàbìdì anyi bàsàtù dýì dyònsò dijaadikiibwè.” Ke mùtùbi pa buloba bujimà. Dìbà adi citùdi bindile ncinyi? Tudi nè bintu byònsò ànu mu byanza byètù

mene, kùdì Mukalenge Yesù. “Yéyè mmutùpèeshe bintu byònsò cyanaàna.”

¹⁸⁰ Mpindyewu netùbangè mulongo wà babèèdi. Nènku bu Yesù Kilistò mwà kwenza kaaba aka dilòlòlò edi. . .

¹⁸¹ Mpindyewu, mbanganyì bàà kunùdì bàdì bamanyè fòtò wa Mukalenge Yesù, Bukènkè abu's? Wnèwù bònsò nudi bamanyè bwalu Abu, pàmwè nè bònsò. Ûdi mu Washington, DC, mukwàciibwe kùdì muntu uvwa mutàmbe bwimpè uvwa Edgar Hoover mupetè mu ndambù wa bidimu bishààle ebi, George J. Lacy, mukwàci wa mudimu bwà tushoonyi twà byàlà nè mikàndà mifundà. Tudi nè cyàlà cyèndè—cyèndè ànu pa dibèji apu. Aci, ncyà bushùwà. . . Wàkamba nè ùkaavwakù mudyàmbidile musangu kampàndà nè cìvwa ndilonga dyà maalu à mu nsòmbelu, mvwa mbala meeji à bantu. Yéyè nè: “Kàdi, Mukalenge Branham, disù dyà cyamù cyà fòtò adi kadyènakù mwà kukwàta dilonga dyà nsòmbelu to.” Yéyè nè: “Bukènkè mbutùute mu tulòndò.” Nènku tudi naabì bifunda byònsò pa dibèji, byènda pàmwè nè fòtò awu nè, Bukènkè mbutuute tulòndò.

¹⁸² Mbanganyì bàcìdì ànu nè mwoyi, pààkamwènekàBu dyàmbedi kumpàlà kwà bantu ku musùlù kwàka, pàmvwà munkaci mwà kubàtiiza nkàmà yà bantu ayi kuntwaku ditùkù adi apu? Mu nzùbu emu, elàayi cyanza muulu. Kùdì byanza bisàtù anyi binaayi, bàcìdì ànu nè mwoyi, bàà kùkaadi bidimu, lwà ku musùlù eku pààkapwekàCi, nè Mukenji wà Mukalenge kulwawù. Wùcidi ànu wùmèwèmwè awu's! Cyàkenza ànu cìvwàCi cyàmbè aci anyi? Nè, mudimu wà bwambi wùndì mufwànyine kwikala nyiisha, mmufwànyine kutwàdija ditàbuluja pa buloba bujimà, pabwìpi menemene nè Dilwa diibidì dyà Kilistò. Tàngilàayi cidiwu mwènzè. Nwamònu anyi? Mwàkapàtuka, mwòmù amu, Oral Roberts nè bakwàbò bònsò aba. Nwamònu anyi? Nènku's ke dyòdì edi diyè pa buloba bujimà, mu ditùnga nè ditùnga dyònsò, bantu bònsò, mu mwakulu wònsò. Tupyà twà ditàbuluja ke kuteematù eku, masangisha manène à dyondopa nè kaàshàadi. Nwamònu anyi?

¹⁸³ Mpindyewu, ikàlaayi badilongòlòle. Munda, pambèlu, mwaba wònsò wùdì usanganyibwa awu, akidilà Kilistò. Neummwakidilè anyi, dilòlòlò edi?

¹⁸⁴ Mpindyewu, kubangila ànu ku mpindyewu, ndi ndilàmbula mèmè mwinè kùdì Mukalenge Yesù, bwà ngàmònakù mwà kukùmbana bwà kudilekelela kùdì Nyumà, ànu bwà kutùmbisha Yesù Kilistò; kì mmèmè to, kàdi Yesù Kilistò; bwà nè bantu aba, cisàmbà cyànyi, balundà bàanyi, munda nè pambèlu pàà cimenga, bààmòna mwà kumanya nè Èvànjeeliyò ùndi muiyishe ewu ùdi. . . ànu Bulelèlà bwà kabùyì dyela mpatà ebu. Nè Kilistò ùdi kaaba aka bwà kuMushindika nè m'Bulelèlà, ku Dìyi Dyèndè nè Nyumà Wendè.

¹⁸⁵ Netwikalè nè cyà kubàbiikila ànu umwe ku musangu. Nàнку nèt wikalè nè cyà... Netubangè nè nombà ùmwè, Q nombà ùmwè. Udi naakù nganyì? Pawikalà—pawikalà kùyi mwà kujuuka mpindyewu to, bakùlù nebàkwambùlè. Tudi baswè kwangata yònsò wa kunùdi. Q nombà ùmwè. Mwanèètù Hickerson, Billy Paul... Anyi, indilaayibi, Doc neàmwbambùlwishè kaaba aka. Q nombà ùmwè, udikù mwà kwela cyanza muulu anyi, yònsò udi nendè awu. Udi mutwishibwe nè aci civwa Q anyi? Anyi, èè, kaa, mfwilèku luse. Èyo. Bànda kumpàlà eku. Muleejàayi mùshindù wà, kupicila mu kajila kàaka. Q nombà ùmwè. Èyo.

¹⁸⁶ Nombà ibidì, elà cyanza muulu, bu wèwè mwà kuswà. Èyo, inàbànzà udi musòmbe lwà paanyimà apa ewu. Èyo, inàbànzà, lwàkù. Disebèle njila ùlwa *mwab'ewu*; bu nwènù bònsò mwà kumupicisha. Bansongààlùmè abu nebàkwambùlwishè, bawisiyè nè bakwàbò. Q nombà isàtù, elà cyanza muulu. Nombà isàtù. Udikù mwà kwela cyanza cyèbè muulu, yònsò udi nè Q nombà isàtù awu. Tùmonèbi pìikalà mukàji udi uya ewu, ní ùdi nè kartà. Wèwè—wèwè kwèna naakù anyi? [Mwanèètù wa bakàji kampàndà ùdi wàmba nè: “Mwanèètù Branham, mwà mulòmbe kartà. Kàdi mwà mumòne mulundà wanyì kampàndà, uvwa mwimàne nè mwànà wa balùme ùsaama.”—Muf.] Kwèna—kwèna mwà kwenza nàнку to. [“Ncyèna mwà kucyènza to?”] To. Bikèngela ùkàlamè nè ùteelejè dileeja dyà njila. Netwàngatè mwànà awu, nànsha bìshi. Nwamònu anyi? Udi ulwa ànu pàdì nombà webè mubiikidiibwe. Mwànà wa mu dibòko awu ùdi mwà kulwa pàdiye mubiikidiibwe apu. Nwamònu anyi? Bìdi ànu bìmpè.

¹⁸⁷ Nombà ùmwè, ibidì. Nganyì udi nè nombà isàtù? Elà cyanza muulu. Nombà isàtù. Nombà inaayi.

¹⁸⁸ Mpindyewu, abi's mbilenga byà dikèma bwèbè wèwè, mwanèètù wa bakàji, nànsha byòbì nè ùvwa nganyì, inàbànzà uvwa muswè kwenza nàнку awu. Nwamònu anyi? Kàdi, nwamònu's, nombà wabò yèyè mubiikidiibwe, nebàlwe ànu bu... Bòbò kabàyi babiikidiibwe to, tudi tubàpeta, nànsha byà munyi. Nwamònu anyi? Tudi baswè bwà wèwè kwikala ànu pa kaaba kèèbè, bwà wamòna mwà kwangata kaaba kèèbè, wèwè pèèbè, nudi numòna's. Nwamònu anyi? Èyo.

¹⁸⁹ Nombà isàtù. Nombà inaayi. Nombà itaanu. Q nombà itaanu, bàndishà cyèbè... Lwà paanyimà menemene apu, mukàji mutekète. Nombà isambòmbò. Èyo, nsongààlùmè awu. Nombà mwandamutekète. Muntu mulùme udi lwà apa ewu. Nombà mwandamukùlù.

¹⁹⁰ Bikèngela twènzè nùnkù's. Nudi numòna's, kwèna mwà kucyènza to; nudi ànu nudisangana bapàte patapata, udi mufwànyine kwamba nè: “Muntu yònsò mmuswè bwà bàmusambidilè.”

¹⁹¹ Lekèlaayi nnùleejèku cintu kampàndà, panwikalà baswè kumòna nè mbwà cinyi bìdi bikèngela bwà twètù kubèèlesha mulongo. Bantu bônso mwab'ewu bàdi baswè kubànda bwà kubàsambidilabò, elàayi byanza byènù muulu, muntu nè muntu, nànsha wèwè mwikàle nganyì. Tàngilàayi mwaba awu. Nganyì wâlwa dyàmbedi? Nwamònu anyi? Bikèngela kwikalè muntu kampàndà.

¹⁹² Billy ùdi ùpweka mwab'ewu, wàngata twartà etu, nè ùtùcyòmpakaja twònsò kumpalà kwènù, nè yèyè ùdi ùfila kartà kàà disambila kùdi ewu yònsò udi naakù dijinga. Udi mufwànyine kupeta itaanu, isambòmbò, nè misangu mikwàbò netùbangilè mwaba kampàndà mukwàbò. Nè kabyèna nè cìdìbi bìshintulula to mwaba wutùdi... Nè pashìishe aba bàdi mu batèèleji amu bàdi cyà bushùwà bòndopiibwa kumpalà kwà bóbò aba bàdi pa cibùmbà cyà ku cyambilu, misangu mikwàbò. Mbanganyì bàdi bamanyè nànkù, nè beenyi nè... Èè, bushùwà, kabyèna naaci bwalu to.

¹⁹³ Nombà isambòmbò, awu ùkaadi mulwè anyi? Nombà mwandamutekète. Nombà mwandamukùlù. Nganyì udi nè kartà kàà disambila nombà mwandamukùlù? Nukàadi naakù anyi? Nombà citèemà.

¹⁹⁴ Mwandamukùlù, nombà mwandamukùlù, tudi baswè nùmupetè mpindyewu. Pàmwápa mmuntu kampàndà pambèlu apu. Yèyè mwikàlepù, muntu kampàndà elè cyanza cyèndè muulu, anyi cintu kampàndà, muntu kampàndà pambèlu, uvwa kàyi mwà kubwela to. Nombà mwandamukùlù. Mwanèètù Collins, kùdikù muntu kampàndà paanyimà pààpa, kartà kàà disambila nombà mwandamukùlù, ùteeta bwà kubwela anyi? Èyo, kartà kàà disambila nombà mwandamukùlù. Èyo.

¹⁹⁵ Nombà citèemà. Kartà kàà disambila citèemà, elà cyanza muulu. Pàmwápa mmupàtùke, kàyi mwà kubwela to. Yèyè mubwelè, mubwejaayi mu mulongo.

¹⁹⁶ Nombà dikùmi, elà cyanza cyèbè muulu. Muntu udi paanyimà lwà mu ndekeelu mwàmwa awu. Lwàkù, mukalenge. Ndi nè disànka dyà kukumòna mubiikidìibwe munda emu. Uvwa mwimanè lwà paanyimà pààpa, mikòlò mikwàte tukùlàkàji. Nombà dikùmi.

¹⁹⁷ Nombà dikùmi nè umwe. Elà cyanza muulu, ewu yònsò udi nè kartà kàà disambila kàà Q nombà dikùmi nè umwe awu. Èyo, dikùmi nè umwe.

Dikùmi nè ibìdì, Q nombà dikùmi nè ibìdì. Kwàka... Èyo, dikùmi nè ibìdì.

¹⁹⁸ Dikùmi nè yisàtù. Dikùmi nè yisàtù. Elà ànu cyanza cyèbè muulu cyanààna, bu wèwè mwà kuswà, bwà ngaamòna mwà kumòna. Kartà kàà disambila dikùmi nè isàtù, Q dikùmi nè isàtù. Dikùmi nè inaayi. Dikùmi nè inaayi. Dikùmi nè itaanu. Mbùngì kaayi bwà twartà tùdi mwabànye, Billy, lukàmà anyi? Dikùmi

nè isatu, dikùmi nè inaayi, nè dikumi nè itaanu, ntupangike. Karta kàà disambila dikùmi nè isàtù, dikùmi nè inaayi, nè dikùmi nè itaanu, nudi kaaba aka anyi? Dikùmi nè itaanu, dikùmi nè isambòmbò, dikùmi nè mwandamutekète, dikùmi nè mwandamukùlù, dikùmi nè citèemà, makùmi àbìdì.

¹⁹⁹ Q wa kumpàlà, pashìishe kwangata J, nè pashìishe kuya bapwekè ànu nè mulongo. Ndi ngèèla meeji nè bàdì bàteeta bwà kujikija twòtù etu, dyàmbedi, nwamònu's. Paanyimà pàà twètù babìikile atu, netùbwelè mu tukwàbò ànu patùdì twenda tulwa apa. Wamba nè? [Mwanèètù wa balùme kampàndà ùdì wàkula nè Mwanèètù Branham—Muf.] Ke cyòci aci. Nudi numòna's, tudi twabanya twartà, mu dindà emu, nè bantu kabàvwa bààlukila to, pàmwàpa. Nwamònu anyi? Èyo.

²⁰⁰ Tùbangilàayi pa kakesè aku. Mmunyì... Wèwè udi ànu bu mu cipidì mu mulongo wèbè kuntwaku mpindyewu anyi? Èyo. Mpindyewu, nganyì udi nè dikùmi nè itaanu, dikùmi nè isambòmbò, dikùmi nè mwandamutekète, dikùmi nè mwandamukùlù, dikùmi nè citèemà, nè makùmi àbìdì, nè dileetà dyà Q? Makùmi àbìdì nè umwe, makùmi nè àbìdì nè ìbìdì, makùmi àbìdì nè isàtù, makùmi àbìdì nè inaayi, makùmi àbìdì nè itaanu. Mpindyewu ikàlaayi ànu badilongòlòle, pàdì ànu ewu wùjika. Tudi nè mulongo mùle tètè kaaba aka mpindyewu. Nè pashìishe netùlwe dyàkàmwè kùdìbo, kutùngunuka nè kupweka nè mulongo, pashìishe kutùpika dyàkàmwè kubwela mu twartà tùdì tushààle, twà J, mwaba utùdì bashìikidile, nè tutùngunuka nè kupweka too nè mutwàfikà ku ndekeelu kwàtù.

²⁰¹ Mpindyewu ikàlaayi ànu nè kaneemu kàà menemene bwà katancì kakesè cyanààna. Mpindyewu, mvw'a kujinga bwà twìkalakù nè mwaba wà kusòmbesha bantu. Mvw'a njinga bwà kwìkalakù mùshindù kampàndà wùmvwà mwà kucyènza, kàdì katwèna naawù to. Kàdì, mpindyewu, ndi muswè bwà nwìkalè ànu mu kaneemu kàà menemene. Mpindyewu, kùcidi ànu dìbà. Nkushààle tusunsa dikùmi bwà dìbà citèemà's. Disangisha nedipàtukè, mu citùpà cikwàbò cyà dìbà. Pa nàнку, eci ke dyoya dyà disangisha, nè pa nàнку mpindyewu ikàlaayi nè kaneemu kàà menemene. Shààlaayi bapùwe ànu byà menemene ebi. Kanùtàmbakanyi eku nè eku to.

²⁰² Nèнку mbanganyì mwab'ewu bàdì kabàyi nè kartà kàà disambila, kàdì pèèbè muswè bwà bàkusambidilè? Elàayi byanza muulu. Èè, bidi ànu myaba yònsò. Mpindyewu, wèwè kùyì nè kartà kàà disambila to, ndi muswè nkupèèshèku ndambù wa Mifundu.

²⁰³ Musangu kampàndà Mukalenge wetù ùvwa ùya bwà kajuula mwànà wa bakàjì mutekète, mufwè, uvwa kàyì mwànjì kufwà to, mwànà wa bakàjì wa Zekààyò. Ke mukàjì kampàndà kwambayè munda mwà mwoyi wèndè nè: "Ndi ngùitabuuja nè Yèyè m'Muntu wa cijila. Ndi ngùitabuuja nè Yèyè m'Maasiyà

awu.” Nènku ùvwa nè dìsaamà dyà mashi àlwa munda kùkaavwa bidimu byàbûngì. Ke kudifindayè mu musumbà wà bantu awu nè kulengayè civwàlù Cyèndè. Kacya nukààdikù babalè bwalu abu anyi?

Ke Yesù kwimana, kwamba nè: “WàNdengì awu nganyi?”

²⁰⁴ Ke Peetèlò kuMutàndishayè. Kwambayè nè: “Èè, bônso bwàbò’s nyèwù bàKulenga. Kàdi bwà cinyi Wèwè udi wamba nè: ‘WàNdengì awu nganyi?’”

²⁰⁵ Yèyè nè: “Ndi mupete butekète. Bukolè, dikàndà’s ndipàtùke mu Mèmè emu.” Nudi numòna cìdìci cìkwenzela anyi, cìkèèna-kumòna? “Ndi mupetè butekète. Dikàndà ndipàtùke munda Mwànyì.”

²⁰⁶ Ke kukènzakanaYè, mu batèèleji amu, too nè mwàkajandulàYe mukàji awu. Ùvwa nè bwòwà. Ùvwa wèla meeji nè mmwenzè cintu kampàndà cyà cibì. Kàdi kumutàngilaYè, nè kumwambilaYè bwà dìsaamà dyèndè dyà mashi àlwa munda adi, wamba nè: “Diitabuuja dyèbè dyàkusungidi.” Mbanganyi bàdi bamanyè nè aci m’Bulelèlà?

²⁰⁷ Mpindyewu, nwènù bamanyi bàà mabàla bàà Bible, Bible ùdikù wamba, nè: “Yesù Kilistò ùdi mpindyewu mene Mwakwidi Munène, wetù Mwakwidi Munène, udi mwà kulengiibwa kùdì dyumvwa dyà mateketa ètù” anyi? Mbanganyi bàdi bamanyè nànkù? Èè, pìikalàYe Mwakwidi Munène mpindyewu udi mwà kulengiibwa kùdì dyumvwa dyà mateketa ètù, mmunyì mùvwàYe mufwànyine kwenza maalù, pìikalàYe umweumwe awu makèlèlèlè, leelù, too nè kashidi? Bìvwa bikèngela bwà kwenzaYe maalù mùshindù wùmweùmwe wàkenzàYe musangu awu awu. Ncyà bushùwà anyi?

²⁰⁸ Èè, mpindyewu, Yèyè kèna nè mubidi wà musunya mpindyewu to, bwalu ùkaadi ku dyàbalùmè dyà Nzambi. Kàdi Yèyè ùdi nè mibidi yètù yìdìYe ùkwàcilamù mudimu, nènku n’Nyumà Wendè udi ukwàcila mudimu munda mwètù, mùvwàYe mwambè nè mmùvwàbi amu. “Mèmè nèngiikalè neenù, munda mwènù; byenzedi bìNdi ngèza, nenùbyènzè pèènù. Nenwènzè byàbûngì bipite ebi, bipite, bwalu Ndi nya ku Taatù.” Mmufwànyine kwimana pa kaaba kèètù. Nwamònu anyi? Kàdi Yèyè’s mmufwànyine kutùlaaba maanyi nè Nyumà.

²⁰⁹ Mpindyewu, nwènù badi mu bateeleji amu abu, tàngilàayi nwènù ànu mùshindù ewu. Nènku kanwikadi nuntàngila mèmè bu Mwanèètù Branham to. Wèwè ambà ànu nè: “Mukalenge Yesù, Wèwè udi Mwakwidi Munène, nè Udi mu nzùbu emu. Nènku ndi muswè kuKulenga nè mateketa àànyì, nKwambila nè, ndi nsaama. Nènku Wèwè unshindikilèci, nè lekèlèlè ànu Mwanèètù Branham àkudimukè mùshindù awu, ku Nyumà Webè, nè àngambilè muWàkambila mukàji awu amu. Aci’s necikosè bwalu.” Ndi ngèèla diitabuuja dyènù kadyòmbò, mu Dinà dyà Mukalenge, bwà kwenza nànkù. Mpindyewu nùmonè

ní ncyà bushùwà anyì kí ncyà bushùwà. Lòmbaayi Nzambi aci, kàdi nùmonèbi ní cidi cipàtuka ànu mùshindù awu's. Mpindyewu ikàlaayi ànu mu kaneemu kàà menemene.

²¹⁰ Mpindyewu nudi mwà kutwàla babèèdi bèènù. Anyi, ewu ùvwa mmuntu mulùme awu anyi? Èyo. Cintu cyà kumpàlà mu mulongo, eci citùpà cyà mulongo. . .

²¹¹ Kùdi bantu bààbûngì kaaba aka. Tudi tuteeta bwà kupangisha bantu, beena Jeffersonville; tulekela ànu bantu bàà pambèlù pàà cimenga, bàdi bàsàkilangana bwà kubwela abu. Bwalu, mu mulongo wà mùshindù ewu, bu nè bantu bàvwa bàà múnwemu, mu Jeffersonville emu, bàvwa bafwànyine kwamba nè: “Mòna's, Mwanèètù Branham mmumanyè bantu abu. Bushùwà's, s'ki cyòci aci.” Kàdi, mu bushùwà bwà bwalu, kacya kabàtukù bânjì kubwela mu Àfrikè, nè mu Inde, nè mu Asie, nè mu Mputu, nè pa buloba bujimà, mu myaba mikwàbò to. Kàdi ncyèna mumanyè aci to.

²¹² Ndi ngiitabuujà nè, bantu bònsò bàdi mu mulongo mwab'ewu mpindyewu, bwànyì mèmè bàdi bàmwèka bu beenyi kùndi. Nwènù bònsò nudi beenyi kùndi anyi? Elàayi ànu byanza byènù muulu panwikala beenyi kùndi. Èyo. Abi's mbîmpè. Mbanganyì mu batèeleji amu bàdi beenyi kùndi, anyi bamanyè nè mèmè ncyèna mumanyè cidi cinùtácisha? Ànu muntu kanà yònsò ewu, nànsha yèyè nganyì. Cyà bushùwà, kwèna mumanyè to, nwamònu's. Kàdi Yèyè ngudi mumanyè. Mpindyewu, ncyèna ngàmba nè Yèyè neàcyènzè to. Kàdi bu Yèyè mwà kucyenza, dibà adi aci cidi ciMuvwija mwikàle kaaba aka mene.

²¹³ Mpindyewu, muntu udi apa ewu, ngèèla meeji, ùvwa mwele cyanza muulu nè, yèyè nè mèmè tuvwa beenyi muntu kùdi mukwèndè. Tudi beenyi. Kacya ncitukù mwânjì kumòna muntu awu to kacya bàndela. Ndi nè. . . [Mwanèètù wa balùme awu ùdi wàmba nè: “Kacya ncitukù mwânjì kukumòna to.”—Muf.] Yèyè kàtu mwânjì kummònakù to kacya bààmulela too nè mpindyewu mene. Tudi babwelè mu nzùbu emu, nè bamònàngàne muntu nè mukwèndè mpindyewu bwà musangu wètù wà kumpàlà.

²¹⁴ Mpindyewu, eci's ke cimfwànyì cipwàngàne cyà Filipò wènda ùya, ùkangata Natànàèlà, nè Natànàèlà ùlwa kumpàlà kwà Yesù. Mpindyewu, kí mbwena kwamba nè yèyè ùdi Natànàèlà, anyi mèmè Yesù to. Mpindyewu, kanwèdi meeji nànkù to. Kàdi mbidimu bimanè kupita, ku mlayì kampàndà ùvwa mufila cikondo aci. Kàdi bantu bàbìdi mbòbò aba bàvwa kacya kabàyikù bânjì kutwilangana kacya bààbàlela, ànu mùvwà bantu balùme bàbìdi abu musangu awu amu. Nènku bu Yesù mwà kushààla umweumwe awu, yèyè ùdi mwà kulàmbula nyumà wèndè ku diitabuujà, nè mèmè ndi mwà kulàmbula nyumà wanyì ku diitabuujà, kùdi Kilistò, ku dipà dyà kùdi Nzambi dyà Nyumà Mwîmpè, nè yèyè ùdi mwà kwenza

cishimà cìmwècìmwè aci. Ncyà bushùwà anyi? Nè ncitàmbe-mfùkilu. Wèwè udi wamba nè: “Nènku cishimà?” Èè, mmunyi mûndi mufwànyine kucimanya, piikalàbi nè ncitukù mwanji kumumòna? Byanza byànyì mbyòbi ebi. Kacya katùtukù banji kutuutakeena kumpàlà to. Twètù, s’ki twètù aba biimàne, bwà musangu wà kumpàlà. Nzambi mmumumanyè; mèmè ncyèna mumumanyè to.

215 Mpindyewu, vùlukàayi, ikàlaayi mu disambila bwànyì mèmè. Mpindyewu, mîngà misangu mu ebi—mu ebi bikondo, Nyumà ùdi ùlaaba, ùdi munkaci mwà kucyènta bikolè mpindyewu, too nè mùdibi byènzè bu... Èè, ndi—ndi muswè ànu bwà nùshaalè basòmbè bapùwe. Ikàlaayi nè kaneemu kàa menemene. Tàngilàayi. Ikàlaayi mu disambila.

216 Mpindyewu, ndi muswè ànu bwà wèwè, mukalenge, nciyi mukumanyè to, kàdi udi kaaba aka mbwà kabingilà kampàndà kàndi nciyi mumanyè to. Kàdi cyònsò cìdiku aci, nè Mukalenge Yesù neàngambilè cyùdi Wèwè ukèba kùdiYe, kùyi wèwè mucingambile to, aci’s ncifwànyine kuMuvwija ànu cìmvwà mwambè nè ke cìvwàYe, umweumwe awu makèèlèlè, leelù, too nè kashidi. Udi witabuuja aci anyi? [Mwanèètù wa balùme awu ùdi wamba nè: “Bushùwà’s.”—Muf.] Èyo. Yèyè ùdi witabuuja aci. Nènku mpindyewu batèèleji bàdi biitabuuja aci. Nè Mukalenge mmwambè nè Yèyè neàcyènzè, mu Bible Wendè.

217 Mpindyewu, ke mwaba ewu wùndi mèmè musangànyibwe anyi ngàmba Bulelèlè nè Bible wa Nzambi, anyi Bible mmulayè cintu kampàndà cidiYe kàyi mwà kutwà nyama ku mikòlò to, anyi ndi mwena lubombo; eci anyi cikwàbò. Nwamònu anyi? Ncyà bushùwà. Wamònu mwaba wùdi muditèèke. Nkàadi mwenzè nànkù kumpàlà kwà binunu byàbùngi menemene byà bantu, badyudi nè bònsò. Kàdi ndi mumanyè nè Yèyè ùdi ùlaya, nè Ùdi ùshàala mukwàte ku mulayi Wèndè.

218 Ndi nCimòna cibanga apa mene mpindyewu. Ndi mmòna bantu bakunyungùlùke. Ku cibumbà cyà ku cyambilu mu masangisha à pambèlu awu, kacya katùvwa nè muntu nànsha umwe mu nyungulukilu to. Nwamònu anyi? Kùdi babèèdi kaaba aka. Padici ànu nè Cyàbangi, nudi mwà kuCyùmwa. N’Nyumà Mwimpè. Ikàlaayi nè kaneemu kàa menemene mpindyewu, ànu nè kaneemu kàabùngi mpindyewu, mutùdi mwà kwakula. Èyowà’s, mukalenge. Mukalenge Yesù’s mmutunangè twètù bònsò bàbidi, bwalu tudi bantu balùme bàbidi bàakafwilàYe. Nè ewu’s mmusangu wètù wà kumpàlà wà ditwilangana. Wèwè mwikàle mu dikèngela dyà cintu, Nzambi mmukumbàne bwà kukumbaja dikèngela adi, bwalu Yèyè mmulayè nè ke cìvwàYe mwà kwenza.

219 Kàdi mpindyewu, muntu ewu, yèyè nè meeji matòòke mu mwoyi wèndè, mmumanyè nè cintu kampàndà cidi munkaci mwà kwenzeka. Kènà ànu mwà kwela meeji menemene nè ncinyi

to. Kàdi Mwanjèlò unùdì numòna mu fòtò awu, ùdi ùtàmba kwenda kuseemena pabwípì menemene nè muntu awu, nè ùdi wènda wènguluka ùmuka kùndì. Nènku muntu ewu ùdi ùsaama disaamà dyà mwoyi, nè ùdi nè disaamà dyà nsùkaadi. Ncyà bushùwà. Aci cidi EMU MMÜDÌ NYUMA WAMBABA. Aci ní ncyà bushùwà, elà cianza cyèbè muulu.

²²⁰ Mpindyewu, piikalàbi nè ncitu mukumòne to, mmunyi mûndì mufwànyine kumanya cintu kampàndà bwà bwalu bwèbè? Mu mùshindù kampàndà, mùshindù wùmwèwùmwè ùvwàYe mumanyè kuntu kwàka awu. Ncyà bushùwà anyi? [Mwanèètù wa balùme awu ùdi wamba nè: “Ncyà bushùwà.”—Muf.] Batèèleji bàdi biitabuujà nànkù anyi? [Disangisha didi dyàmba nè: “Amen.”]

²²¹ Mpindyewu, bwà cinyi—bwà cinyi kubenga ànu kwangata díbà dyètù, ànu katanci kakesè cyanààna, bwà nwàmòna nè kacìvwa ànu dicinka dyà cintu kampàndà to. Twàngatàayi cìngà cintu, bwà kumòna ànu Nyumà Mwimpè ní mmufwànyine kutùbuulwila cikwàbò cintu. Twànjàayi ànu kwakula nè muntu udi mwimàne pààpa wàwa, bwà katanci kakesè cyanààna. Pàmwàpa kùdì cintu kampàndà cikwàbò mu nsòmbelu wendè, pàmwàpa cintu kampàndà cikwàbò cidi cìmutàcisha. Ncyèna mumanyè to.

²²² Ncyèna mumanyè menemene cìmvwà mwàmbè to. Bivwa mwà kwèngela bwà ncimòne pa cisanji cidi cikwàta mikàbà yà méyì mwaba ewu, bwalu, nwamònu's, ncikèèna-kumòna, udi umòna mwaba wùvwàye ùsanganyibwa. Èyowà, ndi ncimòna mpindyewu. Ncintu kampàndà cidi citàngila mashi èndè. Nsùkaadi, èyowà, ndisaamà dyà nsùkaadi. Udi nè disaamà dyà nsùkaadi, nè ncilwè kulela disaamà dyà mwoyi, didi ditwàle dilubakana dyà mwoyi. Yèyè ùdi naadi kùkaadi cikondo kampàndà. Nè yèyè kí ngwa mu cimenga emu to. Kàdi yèyè ngwa mu Indiana, wa mu mwaba kampàndà pabwípì nè mwaba wùdì wùbìikidiibwa nè Borden. Udi... Ndi mmòna Borden. Udi wa ku Borden. Aci cidi EMU MMÜDÌ MUKALENGE WAMBABA. Ki cyôci aci.

Nènku's kùdì cintu cipampàlámùke mu nsòmbelu webè.

²²³ Cìkwàbò cintu ncyôci eci. Ndi mmòna muntu mukàjì ùmwènèka kaaba aka mu cikèèna-kumòna, bwalu wèwè udi ucyùka-...Mmukàjèèbè, kàdi ùdi dijinga nè dyondopiibwa. Nènku ùdi ùsaama disaamà dyà lukosò lwà mùshindù kampàndà. Ndwà mfwèke, lùdiye naalù.

²²⁴ Nè udi nè cintu kampàndà cibì mu nsòmbelu webè, cyùdì munkaci mwà kuteeta kwenza. Ku diitabuujà, wèwè udi mwena Mpenta, bwalu, wèwè, ndi nkumòna mu disangisha dyà beena Mpenta mùdìbo bèèla mbilà nè bàtuuta bikàshì. Nènku udi uteeta kulekela...Udi unwà mfwankà. Ke cyùdì uteeta kulekela, kunwà kwà mfwankà. Aci's ncyà bushùwà

menemene. Aci's ng'EMU MMÙDÌ MUKALENGE WÀMBA. Aci's mbulelèlè. Kí mmwômò anyi? Bushùwà, mmùdibi. Nwamònu anyi? Udi witabuuja nè Yèyè ùdi kaaba aka mpindyewu, mwikàlepù anyi? Udi mudilongòlòle bwà kwitaba dyondopiibwa dyèbè anyi?

Twinyikàayi mitù yètù.

225 Mukalenge Nzambi, Wákabiisha Yesù Kilistò ku lufù Udi kaaba aka mpindyewu awu, muntu ewu, Mukalenge, udi kaaba aka bwà mabènesha à Nzambi ikalè pambidi pèndè, tudi tulòmba bwà Wèwè kumupèèsha dijinga dyà mwoyi wèndè, mu Dìnà dyà Yesù Kilistò. Amen.

226 Alùkila kwèbè kumbèlu, ùkamusangànè ànu mùvwà mwitàbùùje amu. Ke mùshindù wikalàbi ngwòwò awu. Nzambi àkubènèshè.

227 Nudi nwitabuuja anyi? Nzambi wa Bukolè bwònsò, Wákafùnda Bible ewu awu, Mwena Nyumà Wendè Udi kaaba aka awu, mmumanyè nè ncitukù mwànji kumòna muntu awu kacya bándela to, ku dyànyì dimanya, too nè mu kasunsa aka mene. Kàdi, ndi mumanyè cintu cìmwèpelè nè, Nyumà Mwìmpè ùdi kaaba aka mene. Ncyèna mumanyè cyènzàYe to, kàdi ndi mumanyè nè Yèyè ùdi kaaba aka.

228 Ewu ke inàbànzà awu anyi? Èyo. Katwèna bamanyàngàne muntu nè mukwèndè anyi? Èè, wèwè—wèwè—wèwè uvwa mummòne mu masangisha, kàdi mèmè ncyèna mukumanyè to. Ncyà bushùwà. Èyo. Pashìishe, udi kaaba aka bwà kiipàcìlà kampàndà.

229 Mpindyewu, mukàji awu mmufwànyine kwikala kaaba aka. . . Ùdi mwà kwikala mwena Kilistò; ùdi mwà kwikala kàyì mwena Kilistò to. Ùdi mwà kwikala mudyudi. Byòbi nànkù, tàngilàayi ànu cìdì cyènzeka. Nwamònu anyi? Nènku ncyèna mumanyè cidiye mulwile to.

230 Maamù wanyì mmusòmbe mwaba kampàndà mu nzùbu emu, mukàji mukùlákàji. Nudi nwela meeji nè ndi mufwànyine kuteeta kwenzela kakwàcìkwètù kakwàte nè byà luse aku bibi anyi? Nudi nwela meeji nè ndi mufwànyine kulwa kùdiye bu museeswishanganyi anyi? Ncyènakù mwà kwenza nànkù to nànsha kakesè. Mbipìcìbwe nè mèmè muumùke pa cibùmbà cyà ku cyambilu muyè kumbèlu; nkàadi muiyishè Mukenji mujikije. Kàdi apu kí mpàdi Mukenji wimanyina to. Kilistò ùdi umweumwe awu makèèlèlè, leelù, too nè kashidi. Bàà pa buloba nànsha bambè cinyi pa bwalu abu. Bìdi bikèngela bwà twètù kucitwàla, nànsha bishi. Nzambi ngudi mwàmbè bwà kucyènzà.

231 Nciyi mukumanyè to; nènku, mu bushùwà bwà bwalu, wèwè musòmbe mu disangisha kampàndà, pàmwàpa mwaba wùdi nkàmà nè nkàmà yà bantu, ncìvwakù mufwànyine kwikala nè mùshindù nànsha wùmwè wà kukumanya to. Kàdi cimfwànyì

ncyôci eci mpindyewu cyà Yone Munsantu 4, mulùme nè mukàji, batwilàngàne bwà musangu wà kumpàlà. Mukalenge wetù nè mukàji wa mu Sàmaalèyà bàtwilangana cyàkàbidì. Mpindyewu bàwba bayiikila. Kulengayè nyumà wendè, kumanyayè cìwà cìmutàcisha, nè kumwambila, nè mukàji awu kuMujingululayè nè Yèyè ke uvwa Maasiyà awu. Udi mufwànyine kwenza cintu cìmwècìmwè aci anyi? Udi mufwànyine kwenza nàнку.

²³² Batèèleji nebēnzè cintu cìmwècìmwè aci, mukàji yònsò udi mwab'awu anyi? [Disangisha dīdi dyàmba nè: "Amen."—Muf.] Nzambi àcìfìlèku. Èyowà's.

²³³ Mukàji ewu ùdi ùsaama dinyùnguluka dyà—dyà mutù. Mmudisaame kùkaadi ntàntà mule, kùkaadi bidimu byàbùngi. Ncidi ànu mwà kumumòna bu nsongààkàji. Kàdi aci kí ncidi citàmbe kwikala cyà musinga cidiye muswè bwà mèmè kusambidila to. Mbinyòka bìdi bimucìbwile panshì. Ke cyùdi muswè bwà mèmè kusambidila.

Mpindyewu udi witabuuja anyi?

²³⁴ Twàkulèku nendè kàbidì ndambù. Nyumà Mwìmpè énzèku nàнку. Mukàji awu mu bushùwà bwà bwalu ngwa ku—ku baabèndè. Dīnà dyèndè ng'Hanson. Aci's ncilelèlè. Mmwena Norvège anyi mwena Suède, ewu anyi ewu. Wèwè kwèna wa mu cimenga emu to. Udi wa ku mwaba wùdi wùbiikidiibwa nè Canton. Nè dyòdi adi nditunga dinène dīdi nè blé bwàbùngi. Nèuku m'Minnesota. Ke kùdi ufùmina. Aci's ncilelèlè. Mpindyewu alùkilaaku kwèbè kumbèlu; udi mwondòpiibwe. Yesù Kilistò ùdi ùkusàngaja. Ambilà bantu bintu bimpè bìdi Mukalenge mukwenzèle.

²³⁵ Ndi bulelèlè ngèlè meeji nè katwèna bamanyàngàne to. [Mwanèètù wa bakàji awu ùdi wàmba nè: "Èyowà. Mwba mu masangisha, kàdi wèwè kwèna mummanyè to."—Muf.] Ncyèna mukumanyè to. To, mandamu. Kàdi Mukalenge mmukumanyè bulelèlè. Udi kaaba aka mbwà kiipàcìlè kàmpàndà. Ncyèna mumanyè to. Kàdi bu Mukalenge Yesù mwà kunsokolwela cyùdi muvwilè kaaba aka, nèumanyè nī mbulelèlè. Bu mèmè mwà kulwa apa kwamba nè: "Udi usaama, wèwè mukàji." Bushùwà, udi mwimàne mu mulongo wà babèèdi, aci cidi cileejà nè... [Katùpà kàa mukàbà wa mèyi munda mutupù.]

²³⁶ Mateeta àdìbo bakwènzè àdi àleeja nè udi nè cintu kàmpàndà cibi ku mucimà. Mwàmbè nè ndisaamà dyà mucima. Mmwômò. Ngàkulè nendè ànu kasunsa kàmwè. Ànu... Udi witabuuja nè Mukalenge Yesù, uvwa mwakùle nè mukàji wa ku ciinà cyà mâyì awu, n'Yesù umweumwe awu leelù ewu anyi? [Mwanèètù wa bakàji awu ùdi wàmba nè: "Èyowà."—Muf.] Udi witabuuja anyi? Udi, byènzè bu nè udi nè nyumà mulenga. Kwèna wa munwemu to. Udi mufùmine ku esètè, ku Ohio. Ncyà bushùwà. Mu Dayton, mu Ohio, bwà kulwa kaaba aka. Ncyà bushùwà.

²³⁷ Ndi mmòna...Udi munkaci mwà kusambidila muntu kampàndà mukwàbò. Mmwànà wa balùme. Ùdi nè disaamà dyà mwoyi. Ùdi kàbìdì nè byùjà, kàbìdì, mwànà wa balùme wa mùshindù mubìndùlùke. Ncyà bushùwà. Nè wèwè udi munkaci mwà kusambidila musùùkà wèndè, bwalu yèyè kî mmusùngìdìbwe to. Aci ng'EMU MMÙDÌ MUKALENGE WÀMBA. Aci's ncilelèlè. Kî mmwômò anyi? Udi mwondòpìibwe. Alùkilà. Kamwambilà nè, kolèshà mwoyi. Yesù Kilistò. . .

²³⁸ Ncyèna mukumanyè to, inàbànzà, ncyèna mukumanyè to. Nzambì mmukumanyè bulelèlè. Bu Nzambì mwà kungambila cidi lutàtù lwèbè, udi witabuuja nè mèmè ndi musadidi Wèndè anyi? Anu kuMushindika cyanààna. Nwamònu's, cindi muswè kwenza nkufikisha bantu aba, bàdì bàlwa mu mulongo wà babèèdì abu, bwà kumònabò nè Yèyè ùdi kaaba aka.

²³⁹ Cintu kampàndà ncyenzèke mu disangisha. Kùdì bakàji bàbìdì biimàne mwaba awu, bònsò bàbìdì, nè bìnètè. Muntu kampàndà mmuMulengè, nè njiyà yà mateketa èndè. Bu mèmè ànu mwà kumòna mukàji awu, ncinyi. . .Lutàtù lwà ku dici dyèbè alu, nduyè mpindyawu. Tàngilàayi inàbànzà awu, mùdiye ùmwèka bu ewu nùnkù. Bàwba biimàne mwaba awu. Mwà mwà kubàmòna. Kàdì umwe ùwà wènzà *cikampàndà*; nè kakùwà cintu nànsha cimwè kùdì *ewu* to.

²⁴⁰ Kabingilà kààci nkàà nè, ewu mukàji mmwimàne bwà muntu mukwàbò. Ncyà bushùwà. Nè mukàji awu mmwena mutumba neebè. Kàdì ùdi nè binyòka. Nè wèwè udi mwimàne bwà bwalu bwèndè. Nè ndi mukumòne umusambidila, bwalu kî mmusùngìdìbwe to. Nè wèwè udi munkaci mwà kumusambidila. Aci's ncintu cyà bukìtù. Tèeka mùshwàlà awu pambidi pèndè, wùdì naawù mu cyanza awu. Kamwambile nè kèèdì mpatà to, nè àlekelele mwoyi wèndè kùdì Kilistò, nè binyòkà byèndè abi nebimushiyè.

²⁴¹ [Katùpà kàà mukàbà wà mèyi munda mutupù—Muf.] . . udi udila mwadi bwà cinyi, mwanèètù wa bakàji? Udi witabuuja Nzambì anyi? Udi witabuuja nè mèmè ndi musadidi Wèndè anyi? Udi witabuuja nè Nzambì ùdi mwà kungambila cyùdì udidila aci, nè cidi dijinga dyèbè anyi? Wèwè mwitabùùje nànkù, elà cyanza cyèbè muulu. Udi witabuuja nè kààmunda aku nekàmushiyè anyi? Wèwè mucitabùùje, nekàye. Ikàlà wèwè ànu nè diitabuuja. Kwèdì ànu mpatà to.

²⁴² Wetwàwù. Ngèela meeji nè katwèna bamanyàngàne to. Mukalenge Yesù mmutùmanyè bònsò bàbìdì. Udi mukàji mutekète bikolè. Kàdì kwènà mwab'ewu bwèbè wèwè mwinè to. Ndi mòna lùpitaadi lùlwa, bulàalu kampàndà. Nènku mmamwèbè ùdi usambidila awu, nè yèyè mmubwikila kùdì mundidimbì wà lufù. Ùdi ùsaama disaamà dyà kanyòngà, byùjà abi. Nè ùdi nè kànsèrè, yèyè pèndè, mundidimbì mufiike wà kànsèrè. Angatà mùshwàlà awu, wùdì udidilamù mwadi

awu, ùwùtèèkè pambidi pèndè. Nè ùsoka Dîna dyà Mukalenge, nè kwèdi mpatà to. Wèwè kùyi wela mpatà to, Nzambi neàmupàtùlèmu nè neàmusàngàjè. Kwèdi mpatà mpindyewu to. Ndààku mu Dîna dyà Mukalenge, nè itàbùjà.

243 Wèwè udikù mutwìshìibwe nè Kilistò ùdi nè mwoyi anyi?

244 Kùdi cintu kampàndà cijaalàme...Kaa, mmukàjì udi musòmbe paanyimà pààpa wàwa, mu nkwasà wàwa. Ùdi ùsaama dîsaamà dyà mutù. Nè ùvwa munkaci mwà kusambila Mukalenge, mwaba awu, ùteeta bwà kutàbaleela mwànà awu. Mmùkutèèlèje, mwanèètù wa bakàjì. Kwàjìkì kwònsò mpindyewu. Juukilà wèwè ànu kuulu cyanààna, bwà kufila butùmbi kùdi Nzambi bwà bwalu abu, inàbànzà. Fila wèwè ànu butùmbi kùdi Nzambi bwà bwalu abu. Nwamònu anyi?

245 Cyàlengiye aci ncinyi? Yèyè kî mmundenge mèmè to. Kàdi mmùlunge Mwakwidi Munène awu. Ncyèna mumanyè mukàjì ewu to. Ncítukù mwànji kumumòna to, kacya bàndela. Kàdi Nzambi mmùmwondòpe ànu pa díbà adi. Aci cidikù cyèenza Yesù umweumwe awu makèèlèlè, leelù, too nè kashidi anyi? Bushùwà, cidi cyèenza. Bu wèwè mwà kwitabuuja! Bintu byònsò bìdi mwà kwenzeka bwà aba bàdi bìitabuuja.

246 Cìdi cilenga mu batèèleji, muntu kampàndà munkaci mwà kusambila. Nwamònu's, mbilondèshile ku mwaba wùdi dikàndà dìtàmba kukòokesha, mwaba ùdi Nyumà. Ndi mwà kulonda ànu cyanààna nè kwamba mùdiYe wàmba amu; ncyèna mumanyè to. Kaa, mmukàjì udi wàsà bìnetè byèndè, ùfùma ku didila mwadi. Kabingilà kàvwà kènza nè ìkalè ùdila, mbwalu Nyumà ùdi pambidi pèndè. S'ki Yèyè awu. Lutàtù lwà mala àdi àkusaamà awu; ikàlà nè diitabuuja, nelùkuumùkè nè kalwàdyàkwalukila nànsha. Ncyèna mumanyè mukàjì awu to. Kacya ncítukù mwànji kumumòna to. Yèyè kî mmundenge mèmè nànsha. Mmulenge Mwakwidi Munène.

Bu wèwè mwà kwitabuuja!

247 Ncìlengiye mukàjì mukwàbò. Ndi muswè muntu kanà yònsò udi muswè awu, àtàngile kùnweku. Tàngilàayi mukàjì udi munkaci mwà kudila mwadi awu; tàngilàayi mukàjì mukwàbò uvwa musòmbe bìmpè wàwa; tàngilàayi mukàjì mukwàbò uvwa ku luseke lwèndè awu, munkaci mwà kudila mwadi awu. Ùvwa nè dîsaamà dyà mwoyi, inàbànzà mutekète udi musòmbe mwaba awu mene, muntàngile nè webè. . . Èyowà. Ncyà bushùwà. Wèwè uvwa nè dîsaamà dyà mwoyi. Kî mmwômò anyi? Ndimanè kuumuka kùdi. Diitabuuja dyèbè ndipàtùla kapyà nè Nzambi, nè wèwè kuMulenga.

Kaa, ebi's mbilenga be!

248 Nudi numòna inàbànzà udi musòmbe pààpa wàwa nè mutù wèndè mwinyika, munkaci mwà kusambila awu anyi? Mukàjì wa mvyà ku mutù, mwenyi kùndi, musòmbe mwaba awu. Èyowà. Wakùdimuku, è kumutàngila. Ùdi nè dîsaamà dyà kanyonga.

Ûwva munkaci mwà kusambila bwà Nzambi kumuumushadi. Nènku wêwè uvwa munkaci mwà kusambila dîbà adi nè: “Mukalenge, enzàku nè yêyè àmbiikilè.” Ncyà bushùwà. Aci ní ncyà bushùwà, elà cyanza cyèbè muulu. Mmunyì mûmvwà mumanyè disambila dyèbè? Ndimanè kuumuka. Diitabuuja dyèbè dyàkwondòpù. Alùkilaaku kwèbè kumbèlu ùsangalè.

249 Udi witabuuja anyi? Bu wêwè mwà kwitabuuja, bintu byònsò bìdi mwà kwenzeka. Kàdi bikèngela witabuuje.

250 Ûcidi ànu ùtambakana mu citùpà aci, cyà cyûdi musòmbelemù *kuntwaku*. Ànu *mwab'ewu* mene, mwibîdi kuumukila lwà ku ndekeelu, disaamà dyà lwendu lwà mashi àya lùbilu. Bu wêwè mwà kwitabuuja nè mwoyi wèbè wònsò, mwanèètù wa bakàjì, kwàjìkì. Udi witabuuja Nzambi, uMwangata ku Dîyì Dyèndè anyi? Èyo. Elà cyanza cyèbè muulu. Ke cyûvwà wêwè usambidila aci nè: “Mukalenge, enzàku bwà yêyè àmbiikilè musangu wùdi wùlonda, nè lwendu lwà mashi àdi àya lùbilu lukolè elu.” Ndi mwenyi kùdì. Aci ní ncyà bushùwà, nyungishà cyanza cyèbè. Èyo. Cyàkuumukù. Alùkilaaku kwèbè kumbèlu ùsangalè.

251 Nudi numòna cìdici anyi? Ndiitabuuja. Bu nwènù mwà kuciitabuuja! Nudi nwitabuuja anyi? Nwamònu's, bantu bàdi kuntwaku abu, kabàyi nè twartà twà disambila anyi cintu nànsha cimwè to. Nudi badìlongòlòle bwà kwitabuuja anyi? Mùshindù awu ke wàkenzà Mukalenge Yesù pàvwàYe pa buloba anyi?

252 Apa, ewu's—ewu ke mwine, muntu mulùme udi ulwa anyi? Èyowà. Kanwèna bamanyè cìdici cyèenza to, kunùdi nwènù bònsò. Kùdì Branham Tabernacle, mpindyewu tàngilàayi ànu kùneeku ku lusongo lwà cyanza eku. Nwamònu anyi? Nudi bamanyè nè mèmè ncitu ndwa mùshindù awu to. Ncinyi aci? Nyumà wa Mukalenge. Ndilaabiibwa.

253 Bantu bààbûngì kabèèna bùmvwà cìdì dilaabiibwa dyùmvwja to. Bàdi bèèla meeji nè nkwele mbilà. Aci's ndisànka. Bukolè bùdi bùlwa kakùyì tuseku to. Nwamònu anyi? Aci ndisànka dyà Mukalenge. Eci's ke Bukolè bwà Mukalenge; dyondopa, kusàngaja. Tàngilàayi cyàkenzelàYe mwànà mukesè wa bakàjì awu musòmbè dilòòlò adi, mucibùkile panshi; kùdi mpofo; kùdì bakwàbò, myaba yònsò.

254 Wetwàwu, mukalenge. Ngèèla meeji nè katwèna bamanyàngàne to. Katwèna bamanyàngàne to. Ncyèna mukumanyè to, nè kwèna mummanyè to. Piikalàbi nè ncyà bushùwà, elà cyanza muulu. Èyo, musangu wètù wà kumpàlà wà ditwilangana. Mu kaneemu mpindyewu. Muntu mulùme's nyèyè ewu, nè yêyè nè mèmè. . . mutàmba kwikala mwànà mutekète menemene kùndì mèmè, nè byanza byètù byela muulu, muntu nè mukwèndè, kumpàlà kwà Nzambi, bwà nè ewu mmusangu wètù wà kumpàlà wà ditwilangana. Yesù mmumanyè muntu awu.

Nè kùdì nè cyà kwikala cintu kampàndà cibì; yèyè mmwimàne mwaba awu. Ncyèna mumanyè to.

255 Kàdi pìikalàbì nè ndi mwambè bulelèlè, bùdì Nzambì mushindike kùdì bantèmu bààbùngì, bwà nè ndi munwambile bulelèlè, nè: “ku mibùndàbùndà Yèndè wèwè wàkamana kwondopiibwa.” Ncikondo cyà kale. Bikèngela ùpetè diitabuuja dikàyàbàle adi, bwà kubànda kumutù kwà bintu ebi.

256 Tàngilàayi mùdì kànsèrè aku kàjìmina kaaba aka dilòòlò edi! Mpindyewu tàngilàayi ànu mwikalè majaadiki àpàtukilamù, mindidimbì mifiike yà lufù ayi. Ngàngàbukà webè mulenga awu mmufwànyine kuteeta, cyònsò cidiye mwà kwenza aci, bwà kusungila mwoyi webè. Kàdi pàdì Nzambì wamba cintu kampàndà, ke cyôci aci's. Nènku kàvwa mmème to. Ncyèna naaci bwalu to.

257 Mpindyewu kùdì bantu batwè ku nkàmà yibidì kaaba aka bàà kusambidila. Ndi muswè kwikishakù ndambù mpindyewu. Nè pashìishe netùtwadijè ànu kusambidila bantu, kulwa naabò kumpàlà eku; kì nkubàpicisha mu mulongo to, kàdi kwimana kaaba aka munkaci mwà kubàsambidila. Ndi muswè kusambidila bantu bònsò bàdì baswè bwà kubàsambidila abu.

258 Kàdi mu batèeleji emu, nè aba bàdì pa cibumbà cyà ku cyambilu, ndi muswè bwà nùjingululè nè Yesù Kilistò ùdì kaaba aka. Nwènù bònsò nudi bamanyè aci anyi? Bantu bònsò mbamanyè aci anyi? [Disangisha dìdì dyàmba nè: “Amen.”—Muf.]

259 Mpindyewu, bwà kudikòsabù kashidi mu meeji èbè. Muntu ewu nè mèmè, mwab'ewu nè byanza byètù byela muulu kùdì Nzambì, mmusangu wètù wà kumpàlà wà ditwilangana. Bu Yèyè mwà kwakula mùnsokòntù wà mu mwoyi wèndè, ànu mwàkenzelàYe mukàjì wa ku ciinà cyà mâyì awu, anyi kùdì Filipò amu, anyi mu mwaba kanà wònsò mu mudimu Wèndè wà bwambi, bu Yèyè mwà kwenza nànkù, necinùshindikilè nwènù bònsò nè, kakùyì mpatà to, n'Yèyè Mukalenge Yesù anyi?

260 Necikusànkishè anyi, mukalenge? [Mwanèètù wa balùme awu ùdì wàmba nè: “Éyowà's, mukalenge.”—Muf.] Ncyèna nè mùshindù to, ncyèna nè cingènyingenyi nànsha cikesè cyà cidi lutàtù lwèbè to. Ncyèna mumanyè ní ùdì ngènzàmpèkààtù anyi mwena Kilistò to. Ncyèna mufwànyine kukwambila to. Yèyè mmumanyè; Nzambì ngudi mumanyè. Kàdi ncyèna mwà kukwambila to. Kàdi Yèyè mungambile bulelèlè. . . Kàdi wèwè udi mwena Kilistò. [“Éyowà.”] Bwalu, pàdì ànu nyumà webè ùbàkula dilaabiibwa dyà Nyumà udi pambidi pàànyì ewu, ùdì ùMwakidila bímpè, pa nànkù ndi mumanyè nè udi mwena Kilistò.

261 Nènku wèwè udi mwínshì mwà mundidimbì wà ndòndò. Ncintu kampàndà cibì mu mashi. Nè ukààvwa kùdì bangàngàbukà. Nè bôbò mbaswè kukupanda, nè dyòdì dipanda

adi didi nè, ndi ngùmwa bàmba, nè bangàngàbukà bàbìdì bàkonkangana muntu nè mukwèndè, nè mbaswè kupàtula cidimba kampàndà cyà mu mubidi wèbè, cìdìbo bàbìikila nè lubèlèngè. Ncyà bushùwà.

²⁶² Nè kwènà wa mu cimenga eci to, kàdi udi wa mu cimenga cinène mùdì lùpitàadi kampàndà lwà ntèèndeleeu wa mùshindù kampàndà. Cìdi Wheaton. Nè dìnà dyèbè n'Karl Rhodes, Rhodes, cintu kampàndà bu Karl Rhodes. Èyo, mukalenge. Wèwè mwitabùùje nè mwoyi wèbè wònsò, udi mwà kwalukila kwèbè kumbèlu, nè Nzambi neàlamè mwoyi wèbè. Udi uciitabuuja anyi? [Mwanèètù wa balùme awu ùdì wàmba nè: “Ndi nciitabuuja.”—Muf.]

Tùsambilàayi.

²⁶³ Mukalenge Yesù, ndi mpindyewu ngiipata bubì ebu kùdì mwanèètù wa balùme ewu. Nè mu Dìnà dyà Yesù Kilistò, swàkù bwà ìkalè nè mwoyi bwà butùmbì bwà Nzambi. Amen.

Nzambi àkubènèshè, mwanèètù wa balùme. Kwàta njila webè, wenda ucyònkomoka!

²⁶⁴ Mbanganyi bàdì biitabuuja mpindyewu nè mwoyi wènù wònsò?

Mpindyewu, ke bònsò biikalàbo mwà kusambidila anyi? Èyo.

²⁶⁵ Èè, lutàtù lwèbè lwà nyimà ndukuumùke paùvwà musòmbe mwaba awu apu, bwà wamònakù mwà kuditwa mu njila, nè kusànka bu wèwè muswè. Nè tùngunuka wèwè ànu nè kuya, wamba nè: “Twasàkidila Mukalenge mwîmpè!”

²⁶⁶ Ndààku ùkadyè didyà dyèbè dyà dilòlòlò. Disaamà dyèbè dyà cifù adi dyàkuumùku, paùvwà ulwa mu mulongo apu, bwà wamòna mwà kwenda bìmpè, wèwè pèèbè. Itàbuùjà ànu nè mwoyi wèbè wònsò.

²⁶⁷ Binyòkà byèbè abi kabyàkukutàcisha to, wèwè mucitabùùje. Tùngunuka wèwè ànu nè kuya, wenda ucyònkomoka nè utùmbisha Nzambi, bu wèwè mwà kuswà, mwanèètù wa balùme. Èyo. Èyo.

²⁶⁸ Nudi nwitabuuja nè mwoyi wènù wònsò anyi? Mbanganyi bàdì biitabuuja Nzambi? Mpindyewu nèngiikalè ànu mwà kwela cidya kaaba aka bwà katancì kakesè cyanààna . . . 

58-1005^E Muntu Mubiikila Kùdì Nzambi
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org